

四庫全書

史部

欽定四庫全書

史部

陝西通志卷六十四

詳校官監察御史_臣劉湄

檢討_臣德生覆勘

總校官降調編修_臣倉聖脉

校對官中書_臣李奎

謄錄監生_臣唐燦

欽定四庫全書

陝西通志卷六十四

人物十

隱逸

周

漢陰丈人者楚人也子貢適楚過漢陰見丈人方將為
圃畦鑿隧而入井抱甕而出灌澗澗然用力甚多而
見功寡子貢曰有械於此挈水若抽其名為槔用力

甚寡而見功多丈人作色而笑曰聞之吾師有機械者必有機事有機事者必有機心機心存於胷中則純白不備純白不備則神生不定神生不定者道之所不載也吾非不知羞而不為也子貢瞞然慚俯而

不對

莊子

段干木晉人也少貧且賤乃治清節游西河師事卜子夏與田子方干木守道不仕魏文侯欲見就造其門干木踰牆而避文侯文侯以客禮待之出過其廬而

式其僕問曰干木布衣也式其廬不已甚乎文侯曰
干木賢者也不移勢利懷君子之道隱居窮巷聲馳
千里吾敢不式乎干木先乎德寡人先乎勢干木富
乎義寡人富乎財勢不如德貴財不若義高又請為
相不肯後卑己固請見與語文侯立倦不敢息文侯
名過齊桓公者蓋能尊段干木敬卜子夏遊田子方
故也

高士傳

秦

楊碩華陰人隱居華山仙谷交結名士洞習天文知秦將亡漢當興生八子俱從高祖征伐第八子喜擊殺項羽有功封赤泉亭侯餘皆將軍乃賜碩太史公

馬志

漢

邵平者故秦東陵侯秦破為布衣貧種瓜長安城東瓜美故時俗謂之東陵瓜從邵平以為名也

史記蕭相國世家

四皓者皆河內軹人也修道潔已非義不動秦始皇時見秦政虐乃共入商洛隱地肺山以待天下定漢高

聞而徵之不至

高士傳

上欲廢太子立戚夫人子趙王

如意吕后恐乃使建成侯吕澤劫留侯曰為我畫計
留侯曰此難以口舌爭也顧上有不能致者天下有
四人四人者年老矣皆以為上慢侮人故逃匿山中
義不為漢臣然上高此四人今公誠能無愛金玉璧
帛令太子為書卑辭安車因使辨士固請宜來來以
為客時時從入朝令上見之上知此四人賢則一助
也於是吕后令吕澤卑辭厚禮迎此四人四人至客

建成侯所黥布反上病欲使太子將往擊之四人相謂曰凡來者將以存太子太子將兵事危矣乃說建成侯曰君何不急請呂后承間為上泣言呂澤夜見呂后呂后為上涕泣而言如四人意上擊布還愈欲易太子及燕置酒太子侍四人從太子年皆八十有餘鬚眉皓然衣冠甚偉上問曰彼何為者四人前對各言姓名曰東園公用里先生綺里季夏黃公上大驚曰吾求公數歲公邂逅我今公何自從吾兒遊乎

四人皆曰陛下輕士善罵臣等義不受辱竊聞太子
仁孝恭敬愛士天下莫不延頸願為太子死者故臣
等來耳上曰煩公幸卒調護太子四人為壽畢趨去
上目送之召戚夫人曰我欲易之彼四人輔之羽翼
已成難動矣呂后真而主矣史記留侯世家呂后德之將官
爵之四人復入商山呂氏不能留商隱說東園公姓唐
名秉字宣明綺里季姓吳名實字子景夏黃公姓崔
名廣字少通角里先生姓周名術字元道號稱四皓

鴻書

摯峻字伯陵長安人少治清節與太史遷交好峻獨退
身修德隱於岼山遷既親貴乃以書勸峻曰遷聞君
子所貴乎道者三太上立德其次立言其次立功伏
惟伯陵材能絕人高尚其志以善厥身冰清玉潔不
以細行荷累其名固已貴矣然未盡太上之所由也
願先生少致意焉峻報書曰峻聞古之君子料能而
行度德而處故悔愴去於身利不可以虛受名不可

以苟得漢興以來帝王之道於斯始顯能者見利不
肖者自屏亦其時也周易大君有命小人勿用徒欲
偃仰從容以遊餘齒耳峻之守節不移如此遷為李
陵遊說下腐刑果以悔慙被辱峻高尚不仕卒於岼
岼人立祠號曰岼居士世奉祀之不絕

高士傳

楊王孫城固人學黃老之術家累千金厚自奉養生無
所不致病且死令其子曰吾欲裸葬以反吾真必無
易吾意死則為布囊盛尸入地七尺既下從足引脫

其囊以身親土其子不忍往見王孫友人祁侯祁侯
與王孫書王孫曰夫厚葬誠無益於死者而俗人競
以相高靡財單幣腐之地下或乃今日入而明日發
此真與暴骸於中埜何異且裹以幣帛隔以棺槨支
體絡束口含玉石欲化不得鬱為枯腊千載之後棺
槨腐朽乃得歸土就其真宅由是言之焉用久客曰

善遂裸葬

漢書
本傳

成公成帝時人自隱姓名常誦經不交世利時人號曰

成公成帝出遊問之成公不屈節上曰朕能富貴人
能殺人子何逆朕成公曰陛下能貴人臣能不受陛
下之官陛下能富人臣能不受陛下之祿陛下能殺
人臣能不犯陛下之法上不能折使郎二人就受政

事十二篇

高士傳

安丘望之長陵人少治老子恬靜不求進宦號曰安丘
丈人成帝聞欲見之望之辭不肯見上以其道德深
重常宗師焉望之不以見敬為高愈自退損為平醫

於民間著老子章句扶風耿況王汲等皆師事之從

受老子終身不仕道家宗焉

高士傳

張仲蔚者平陵人與同郡魏景卿俱修道德隱身不仕

明天官博物善屬文好詩賦常居窮素所處蓬蒿沒

人閉門養性不治榮名時人莫識唯劉龔知之

高士傳

鄭朴字子真谷口人修道靜默世服其清高成帝時大

將軍王鳳以禮聘之不屈揚雄盛稱其德曰谷口子

真耕於巖石之下名震京師馮翊人刻石祠之至今

不絕

高士傳

時人因子真所居名為鄭泉

雲陽宮記

衛衡字伯梁南鄭人少師隱士同郡樊季齊以高行聞郡九察孝廉公府州十辟公車三徵不應董扶任安從洛還過見之曰京師天下之市朝也足下猶之人耳何具在遠以虛名屢動徵書若至中國則價盡矣衡笑曰時有險易道有汙隆若樊季齊楊仲桓雖應徵聘何益於時乎苟無所則尼軻恹恹是以君平子真不屈其志其子之徒也哉吾何虛假之有安扶服

之敬其言也

漢中士女志

安陵清者有項仲山飲馬渭水日與三錢以償之

三輔決錄

蔣詡杜陵人為兗州刺史以廉直為名王莽居攝詡以

病免官歸鄉里卧不出戶卒於家

漢書鮑宣傳

詡歸鄉里

荆棘塞門舍中有三徑不出惟求仲羊仲從之遊二

人不知何許人皆治車為業時人謂之二仲

三輔決錄

楊寶

震父華陰人

習歐陽尚書哀平之世隱居教授居攝二

年與兩龔蔣詡俱徵遂逃遁不知所處光武高其節

建武中公車特徵老病不到卒於家

後漢書
楊震傳

井丹字大春郿人少受業太學通五經善談論京師為之語曰五經紛綸井大春性清高未嘗修刺候人建武末沛王輔等五王居北宮皆好賓客更遣請丹不能致信楊侯陰就以外戚貴盛乃詭說五王求錢千萬約能致丹而別使人要劫之丹既至就故為設麥飯葱葉之食丹推去之曰以君侯能供甘旨故來相過何其薄乎更致盛饌乃食及就左右進輦丹笑曰

吾聞桀駕人車豈此邪坐中皆失色就不得已令去

輦自是隱閉不關人事

後漢書
本傳

高恢字伯達京兆人少治老子恬虛不營世務與梁鴻

善隱於華陰山中及鴻東游思恢作詩曰鳥嚶嚶兮

友之期念高子兮僕懷思想念恢兮爰集茲二人遂

不復相見恢高抗匿耀終身不仕焉

高士
傳

梁鴻字伯鸞平陵人受業大學家貧尚節介博覽無不
通而不為章句牧豕於上林苑中曾誤遺火延及他

舍鴻乃尋訪燒者問所失悉以豕償之其主猶以為少鴻願以身居作主人許之因為執勤不懈鄰家耆老見非恒人乃共讓責主人而稱鴻長者悉還其豕鴻不受而去歸鄉里勢家慕其高節多欲女之鴻並絕不娶同縣孟氏女擇對不嫁鴻聘之有頃共入霸陵山中以耕織為業詠詩彈琴以自娛仰慕前世高士為四皓以來二十四人作頌因東出關作五噫之歌與妻子居齊魯之間又去適吳依大家臯伯通居廡下為人

債春每歸妻為具食舉案齊眉伯通異之舍於家鴻
潛閉著書十餘篇疾且困告主人曰慎勿令我子持
喪歸去及卒伯通等為求葬地於要離冢咸曰要離

烈士伯鸞清高可令相近葬畢妻子歸扶風

後漢書
本傳

張楷字公超司隸舉茂才除長陵令不至官隱居弘農
山中學者隨之所居成市後華陰山南遂有公超市
五府連辟舉賢良方正不就順帝特下詔曰張楷行
慕原憲操擬夷齊前此徵命未至將主者翫習於常

優賢不足使其難進歟郡時以禮發遣復告疾不到
性好道術能作五里霧時關西人裴優亦能為三里
霧自以為不如楷從學之楷避不肯見桓帝即位優
行霧作賊事覺被考引楷楷坐繫廷尉詔獄積二年
恒諷誦經籍作尚書注後事無驗見原還家

後漢書
張霸傳

韓康字伯休霸陵人常遊名山採藥賣長安市中口不
二價者三十餘年有女子從康買藥康守價不移女
子怒曰公是韓伯休邪乃不二價乎康歎曰我欲避

名乃小女子皆知有我何用藥為遂遯入霸陵山中
博士公車連徵不至桓帝時乃備玄纁安車以聘之
使者奉詔造康康不得已乃許諾辭安車自乘柴車
冒晨先發至亭亭長以韓徵君當過發人修道橋見
康柴車幅巾以為田叟也使奪其牛康即釋駕與之
有頃使者至奪牛翁乃徵君也使者欲奏殺亭長康
曰此自老子與之亭長何罪乃止康因中路逃遁以

壽終

後漢書
本傳

丘訢字季春扶風人少有大才自謂無伍傲世不與俗
人為羣郡守始召見曰明府欲臣訢邪友訢邪師訢
邪明府所以尊寵人者極於功曹所以榮祿人者已
於孝廉一極一已皆訢所不用也郡守異之遂不敢

屈

高士
傳

馬瑤茂陵人隱於汧山以免置為事所居俗化百姓美

之號馬牧先生

後漢書
矯慎傳

法真字高鄉扶風郿人學無常家博通內外圖典關西

號為大儒弟子負笈嘗數百人性恬靜寡欲不涉人間事太守請見之真乃幅巾請謁太守欲以功曹相屈真曰以明府見待有禮故敢自同賓末若欲吏之真將在北山之北南山之南矣太守不敢復言凡辟公府賢良皆不就同郡田羽薦真會順帝西巡羽又薦之帝虛心欲致前後四徵真曰吾既不能遜形遠世豈飲洗耳之水哉遂深自隱絕友人郭正稱之曰法真名可得而聞身不可得而見逃名而名我隨避

名而名我追可謂百世之師者矣共刊石頌之號曰

玄德先生年八十九以壽終

高士傳

樊志張南鄭人博學多通隱身不仕嘗遊隴西時破羌將軍段熲出征西羌請見志張其夕熲軍為羌所圍因留軍中三日不得去夜謂熲曰東南角無羌宜乘虛引出住百里還師攻之可以全勝熲從之果以破賊於是以狀表聞又說其人既有梓慎焦董之識宜輔翼聖朝咨詢奇異於是有詔特徵會病終

後漢書本傳

三國

庖累字伯重京兆人初平中山東人有青牛先生字方正客三輔曉知星歷風角鳥情累隨方正遊學人謂之得其術有婦無子三輔亂隨方正入漢中漢中壤隨徙民詣鄴喪其婦至黃初元年又徙詣洛陽遂不復娶婦獨居道側以甌甑為障施一廚牀食宿其中晝日潛思夜起仰視星宿吟咏內書人或問之閉口不肯言至嘉平中年八九十纔若四五十者縣官以

其孤老給廩日五升不足食頗行傭以裨糧人與不
取食不求美衣敝縕服後病亡

魏畧

劉仲始者長安市僧一為市吏所辱乃感激遂行學問
經明行修流名海內後以有道徵不就人歸其高

三國

魏志裴
潛傳注

晉

楊軻天水人少好易長而不娶學業精微常食粗飲水
衣褐縕袍人不堪其憂而軻悠然自得劉曜僭號徵

拜太常軻固辭曜亦敬而不逼遂隱於隴山曜後為石勒所擒秦人東徙軻留長安石季龍徵之軻以疾辭迫之乃發後歸秦州

晉書本傳

今隴州山中有軻遺跡

隴州

志

南宋

韋元避吏隱長安南山武帝入關以太尉掾徵不至

南史

韋叡傳

陳

馬樞字要理扶風郿人六歲能讀孝經論語老子及長
博極經史尤善佛經及周易老子義梁邵陵王綸為
南徐州刺史引為學士綸時自講大品經命樞講維
摩老子周易同日發題道俗聽者二十人樞依次剖
判開其宗旨然後支分流別轉變無窮綸甚嘉之將
引薦於朝廷尋遇侯景之亂綸舉兵援臺乃留書二
萬卷以付樞樞肆志尋覽殆將周遍乃喟然歎曰吾
聞貴爵位者以巢由為桎梏愛山林者以伊呂為管

庫東名實則芻芥柱下之言翫清虛則粃糠席上之說稽之篤論亦各從其好也乃隱於茅山有終焉之志元嘉元年文帝徵為度支尚書辭不應命及鄱陽王為南徐州刺史欽其高尚卑辭厚意令使者邀之前後數反樞不得已乃行王築別館以處之樞惡其崇麗乃於竹林間自營茅茨而居每王公餽餉辭不獲已者率十分受一樞少屬亂離每所居之處盜賊不入依託者常數百家目精洞黃能視闇中物嘗有

白鷺一雙巢其庭樹馴狎欄廡時集几案春來秋去
幾三十年太建十三年卒時年六十撰道覺論二十

卷行於世

陳書
本傳

北魏

魯祈扶風人遭赫連屈丐暴虐避地寒山教授弟子數

百人好方術少嗜慾

魏書釋
老志

杜景字宣明京兆人學通經史州府交辟不就子裕字
慶延文學相傳仕齊位止樂陵令齊亡退居教授終

於家

北史杜銓傳

鄭修北海人少隱於岐南几谷中依巘結宇獨處淡然
屏跡人事不交世俗耕食水飲皮冠草服雅好經史
專意玄門前後州將每徵不至岐州刺史魏蘭根頻
遣使致命修暫出見尋還山舍

魏書本傳

北周

韋夔字敬遠杜陵人志尚夷簡淡於榮利弱冠被召拜
雍州從事謝疾去前後十見徵辟皆不應明帝即位

禮敬愈厚且為詩以貽之。賈答詩願謁帝大悅。勅有司給河東酒一斗。號曰逍遙公。時晉公護廣營第宅。召賈訪以政事。賈仰視其堂。歎曰。甘酒嗜音。峻宇雕牆。有一於此。未或不亡。護不悅。識者以為知言。武帝嘗與賈夜宴。大賜縑帛。賈惟取一疋。帝以此益重之。孝寬為延州刺史。賈至州。寬以所乘馬及轡勒與賈。賈以其華飾。笑謂曰。舍舊錄新。非吾志也。乘舊馬以歸。宣帝在東宮。遺賈書問以立身之道。賈對曰。儉為

德之恭侈為惡之大願殿下察之夏少留情著述手
自抄錄數十卷晚年虛靜惟以體道會真為務宣政
元年卒於家武帝遣使祭贈有加

周書
本傳

唐

司馬郊字子都隱居華山五十年禽獸日遊目前有如
家馴每灌園不食菜心以其傷生意及四時山果熟
果大大鳥銜果小小鳥銜俱送郊齋中郊歎曰禽鳥
送果甚多但可日料三十顆異日如戒及郊卒百禽

聚於庭悲鳴累日而去

獨異志

孫思邈華原人通百家說善言老莊獨孤信見其少異之曰聖童也顧器大難為用耳及長居太白山隋文帝輔政以國子博士召不拜密語人曰後五十年有聖人出吾且助之太宗初召詣京師年已老而聽視聰瞭帝歎曰有道者欲官之不受顯慶初復召見拜諫議大夫固辭上元元年稱疾還山思邈於陰陽推步醫藥無不善孟詵盧照鄰等師事之永淳初卒

唐書

本傳

田游巖三原人永徽時補太學生罷歸入太白山母及妻皆有方外志與共棲遲山水間自蜀歷荆楚愛夷陵青溪止廬其側長史李安期表其才召赴京師行及汝辭疾入箕山居許由祠旁自號由東鄰頻召不出高宗幸嵩山遣中書侍郎薛元超就問其母賜藥物絮帛帝親至其門游巖野服出拜儀止謹朴帝令左右扶止謂曰先生比佳否曰臣所謂泉石膏盲烟

霞痼疾者帝悅因勅游巖將家屬乘傳赴都拜崇文館學士進太子洗馬裴炎死坐素厚善放還山蠶衣耕食不交當世惟與韓法昭宋之問為方外友云

唐書

本傳

武攸緒則天兄惟良子也恬淡寡欲好易莊周書少變姓名賣卜長安市得錢輒委去

唐書本傳

高太素商山隱士累徵不起在山中構道院二十餘間太素起居清心亭下皆茂林秀竹奇花異卉每至一

時即有猿一枚詣亭前鞠躬而啼不易其候太素因

目之為報時猿其性度有如此

開天遺事

王休居太白山下日與僧道異人往還每至冬時取溪

冰敲其精瑩者煮建茗共賓客飲之

開天遺事

郭休字退夫太白山隱士有運氣絕粒之術於山中建

茅屋百餘間有白雲亭鍊丹洞注易亭修真亭朝元

壇集神閣每於白雲亭與賓客看山禽野獸即以槌

擊一鐵片子其聲清響山中鳥獸聞之集於亭下呼

為喚鐵

開天遺事

吳筠字貞節華州華陰人通經誼美文詞舉進士不中
性高鯁不耐沈浮於世去居南陽倚帝山天寶初召
至京師請隸道士籍乃入嵩山依潘師正究其術南
游天台觀滄海與其名士相娛樂文辭傳京師玄宗
遣使召見大同殿與語甚悅勅待詔翰林獻玄綱三
篇帝嘗問道對曰深於道者無如老子五千文其餘
徒喪紙札耳復問神仙冶鍊法對曰此野人事非人

主宜留意筠每開陳皆名教世務以微言諷天子天子重之羣沙門嫉其見遇而高力士素事浮屠共短筠於帝筠亦懇求還嵩山詔為立道館安祿山欲稱兵乃還茅山因東入會稽剡山大厯十三年卒弟子私謚為宗玄先生

唐書本傳

韋況

賦子萬年人

少隱王屋山孔述睿以諫議大夫召薦況

為右拾遺不拜未幾以起居郎召半歲輒棄官去徙家龍門除司封員外郎稱疾固辭元和初授諫議大

夫勉諭到職數月乞骸骨以太子左庶子致仕卒况

雖世貴而志冲遠不為聲利所遷當時重其風操

唐書

韋安
石傳

崔觀城固人以儒自業身耕耨取給老無子乃以田宅

貲財分給奴婢各為業而身與妻隱南山夫婦嘯詠

相視為娛文宗時左補闕王直方薦觀高行詔以起

居郎召辭疾不至

唐書
本傳

五代

鄭元素華原人少習詩禮避亂南遊居廬山青牛谷高
卧四十餘年採薇食蕨絃歌自若構椽剪茅於舍後
會集古書至千餘卷

南唐書

宋

鄭雲叟本名遨棄家入少室山間西岳有五粒松脂淪
入地千歲化為藥能去三尸因居華陰與李道殷羅
隱之友善道殷有釣魚之術釣而不餌又能化石為
金雲叟目擊其事而不求

續世說

碧雲洞在岳之東乃

鄭雲叟羅隱之翟士端隱居之所鄭遨南燕人天成
中以拾遺詔不起賜號逍遙先生羅隱之新淦縣玉
笥山玉梁觀道士來居華山一觴一咏高情自適天
福中賜號希夷先生翟士端字表正齊人博通九經
祥符中真宗幸汾陰詔不起無疾而逝七日肢體猶
溫鄭隱字明處究之奉符人左臂有黑鱗子如北斗
狀常居王刁三洞自冬涉春不出人咸異之祥符中
真宗祀后土還駐驛驛下賜號貞晦先生又賜歸山

歌

華岳全集

真宗祀汾陰時召華山隱士鄭隱敷水隱士

李寧隱以經術為業遇道士傳辟穀鍊氣之法修習

頗驗居華山王刁巖踰二十年冬夏常衣皮裘寧精

於藥術老而不衰常以藥施人人以金帛為報輒拒

之大中祥符四年賜號貞晦先生上並作詩以賜贈

以茶藥繒帛獨隱辭賜物不受

宋史方技傳

王子華同州人博學能文尤工詩景德中與華山隱者
齊人翟士端兗人鄭隱南燕人鄭遨臨江羅隱之等

號五高士為一時名流所推重

賈志

陳搏字圖南亳州真源人不求祿仕以山水為樂居華山雲臺觀又止少華石室每寢處多百餘日不起因世宗好黃白術有以搏名聞者命華州送至闕下從容問其術對曰陛下當以致治為念奈何留意黃白之事乎世宗不之責命為諫議大夫不受太平興國中來朝太宗待之甚厚九年復來朝上益加禮重宋琪等從容問曰先生得玄默修養之道可以教人乎

對曰搏山野之人非有方術可傳今聖上龍顏秀異
正君臣協心同德興化致治之秋勤作修煉無過於
此琪等以其語白上上益重之賜號希夷先生端拱
初忽謂其弟子賈德昇曰汝可於張超谷鑿石為室
吾將憩焉二年七月石室成搏手書表曰臣搏大數
已終已於今月二十二日化形張超谷中如期而卒
七日肢體猶溫有五色雲蔽塞洞口彌日不散搏好
讀易手不釋卷能逆知人意人咸異之

宋史
本傳華山陳

真人隱於睡馮翊寇朝一常事真人得睡之崖畧後
還鄉惟睡而已郡南劉垂範往謁其從者以睡告垂
範坐寢外聞鼾鼾之聲雄美可聽退而告人曰寇先
生睡中有樂乃華胥調雙門曲也或曰未審譜記何
如垂範以濃墨塗紙滿幅題曰混沌譜云即此是也

清異
錄

种放字明逸洛陽人沈黙好學父嘗令舉進士放辭以
業未成父卒與母隱居終南山豹林谷之東明峯以

講習為業淳化三年陝西轉運使宋惟幹言其才詔
召之放稱疾不起轉居窮僻人跡罕至太宗嘉其節
賜以緡錢使養母咸平元年母卒放水漿不入口三
日廬於墓側詔賜錢帛米助其喪四年兵部尚書張
齊賢言放孝行純至簡朴退靜詔赴闕放辭不起明
年齊賢守京兆復請加旌賁即遣供奉官周旺齎詔
赴闕九月放至對崇政殿詢以民政邊事放曰明王
之治愛民而已餘皆謙讓不對即日授左司諫直昭

文館六年春表暫歸山詔許其請將行遷起居舍人
十月遣使撫問圖其林泉居處以獻景德元年十月
來朝二年擢為右諫議大夫上表乞嵩少養疾許之
大中祥符元年判集賢院拜給事中二年四月歸山
四年正月復來朝拜工部侍郎放屢至闕下俄復還
山人貽書嘲其出處之跡放不答王嗣宗守京兆放
乘醉慢罵之嗣宗屢遣人責放不法仍條上其事放
遂徙居嵩山八年十一月乙丑忽取前章疏稿悉焚

之召諸生會飲酒數行而卒上甚痛悼親製文遣內

侍往致祭歸葬終南

宋史本傳

宋澥長安人有清節不仕與种放魏野遊多篇什酬唱

宋史本傳

高懌字文悅荆南高季興四世孫幼養於外家通經史
百家之書間种放隱終南山乃築室豹林谷從放受
業放奇之不敢處以弟子行與同時張堯許勣號南
山三友會詔舉沈淪知長安寇準薦之辭不起景祐

中錄國初侯王後懌推其弟欣得官及范雍建京兆
府學召懌講授諸生席間嘗數十百人杜衍嘗請賜
處士號乃命為大理評事懌固辭仁宗嘉其守號安
素處士賜良田五百畝文彥博表其經術該通有高
世之行可以勵風俗詔賜第一區嘉祐中除光祿寺
丞復固辭夢道士持素書聘為白鹿洞主卒

宋史
本傳

李植字化光京兆人觀察使士衡之孫自幼好道不樂

婚宦工畫山水劉原父嘗贊之

圖繪
寶鑑

楊沖遠興元人元符中張浚試吏興元與楊用中別問
公往來梁洋其人士有可與遊者乎用中曰楊沖遠
可與為師浚至遂與交

漢中府志

安世通青城山道人本西人其父有謀策為武官數以
言干當路不用遂自沈於酒而終世通隱居青城山
中不出吳曦反乃獻書於成都帥楊輔曰世通雖方
外人竊以為公得曦檄即當還書誦其家世激以忠
義因而散金發粟興仗義之師以順討逆誰不願從

今悠悠不決所謂婦人女子之悲停因長智吾恐朝廷之大失望也輔不能從遂東如江陵請吳獵舉兵討曦未幾曦敗獵使蜀薦士以世通為首云

宋史本傳按

四川通志云安世通本陝西人

金

岳行甫字仁老鄜州洛川人在關中最有詩名泰和初有以仁老時病詩達之道陵者道陵大加賞異授以官不就士論高之詩百餘篇佳句甚多

中州集

元

楊恭懿字元甫奉元人力學強記尤深於易禮春秋父歿水漿不入口者五日居喪盡禮宣撫司以掌書記辟不就至元七年與許衡俱被召恭懿不至衡日稱譽恭懿之賢詔遣使召之以疾不起十一年太子下教中書俾如漢聘四皓者以聘恭懿丞相為書致命乃至京師既入見世祖勞其遠來又親詢其鄉里氏族無不周悉十二年侍讀學士圖克坦公履請設取士

科詔與恭懿議之恭懿言今欲取士宜勅有司舉有
行檢通經史之士試以經藝論策帝善之會北征恭
懿遂歸田里十六年詔安西王相敦請赴闕入見詔
與太史院改歷十七年進奏曰臣等更造新歷一依
前賢定論是日方跪帝命許衡及恭懿起曰無自勞
也授集賢學士兼太子院事十八年辭歸二十年以
太子賓客召二十二年以昭文館學士召二十九年
以議中書省事召皆不行三十一年卒年七十

元史本傳

員炎字善卿同州人負奇氣不事生產大德二年故人

楊紫陽憫其窶用監嵩州酒炎薄之長揖而去嘗遊

河朔以詩名詩稿酒瓢外無長物

賈志

駱天驤字飛卿長安人博涉羣書遊心翰墨樂道丘園

不求聞達

馬志

張全字之美涇陽人自幼好讀書不求聞達以山水文

籍自娛雖在布衣邑人待之如公輔

馬志

第五勝愚字仲學富平人元末不悅仕進鑿洞山中甘

貧樂道日與同志優游於山水間學者稱為第五夫

子

賈志

楊儼字敬夫涉獵經史元末隱陳倉谷中淡然無官情

明初累徵不起

賈志

明

閻正叔侯伯正俱渭南人泰定中同舉進士正叔授五經博士伯正授太常博士後以世亂棄官隱居田里洪武初並被徵至京深衣幅巾入見以年高辭不願

仕明太祖見其鬚眉皓然禮之使歸俱以壽終於家

賈志

黃奮字熙載華陰人洪武初為博士教世子旋歸常乘

牛車賦詩飲酒郭司馬良師事之

賈志

侯文禮白水人為入質直長厚言動不苟鄉里無少長

皆敬憚之有相競輒就質平無不傾服洪武初累薦

不起

賈志

折鼎獨神木人洪武初以人材薦辟授河南按察司僉

事過中部喜曰此地可居乃卜築於縣西之村晦跡
高蹈婆娑泉石居人亦莫之知一日官府徵夫役曰
往役義也從之役愆期當罰度不能免乃曰君無咎
我我河南按察司僉事也尹驚詫禮而歸之自是人

莫知其終

延安府志

李琛寧羌衛人性恬靜樂道工詩文不求聞達年八十

餘終

馬志

郭琦漢中人弘治中領鄉薦任河南訓導陞解州學正

持身清苦教士有方逆瑾聞其名召之琦托疾不應

後瑾誅諸應聘者坐累琦不與焉人服其先見

馬志

劉价中部人性甘淡泊恬素自守卜隱東莊引水灌竹
著書自娛縣令胡熹三造其廬閉戶不納尋逃入西

山年至八十卒

賈志

王生逸其名咸寧雍端惠公泰幼與生同學泰既貴過
家往訪之時生已棄學業農矣過諸塗謂曰雍泰猶
念貧賤之交乎如不棄予當約期過汝泰敬諾至期

肅冠帶以俟生布衣氍毹背隻雞持瓢酒而至據席

正坐泰以兄事之酌飲必跪生受之亦不辭

續文獻通考

孟彥施綸倪玳俱咸寧人同舉正德八年鄉試時劉瑾以秦人橫作威福彥等皆一上春宮不復再試隱居

讀書以終其身

賈志

高延俊米脂人賦性高邁博學能文以明經選沔縣訓導力辭不赴卜居圓東山谷四圍種鞠讀書彈琴著

述甚富

米脂志

王維藩鄆人神姿清異家苦貧無書從人借讀後竟淹
貫嘉靖甲子舉於鄉或勉以就職藩曰入官以行道
也其次為祿養親今道既未成而親又不吾待五斗
祿將焉用之聞者歎服教授里中為子弟講孝弟之
學遇人急難必竭力赴之曰吾非好名實惡夫世之
以死生貴賤二其心者後以壽終

賈志

黃如籥咸寧人高才能文章善聲律隱於終南山自謂
太乙逸叟又同里趙時中事父母至孝世味淡泊結

廬種竹自號翠微生

賈志

孫太初年十八入終南山繼入太白山嚼草木居息石

崖下時有所得走山最高峰持古松根扣巨奇石以

歌

慎蒙山棲志

太白山人莫知其所自來人問其姓名曰

我姓孫一元名問其字曰我字太初問何以稱太白

山人曰我秦人也嘗棲太白山之巔於是稱太白山

人山人善詩有超逸才嘗出秦四遊南走吳越吳會

人爭禮敬山人山人固善說清虛又渥顏飄鬚望之

如神仙中人於是愈禮敬山人一日病且革屬其友
曰死葬我佳山幸題墓曰明詩人孫一元之墓已而
山人甦起而憤曰幾負我志而吳越人以是覘知山
人初無羽化術稍稍疑避而山人顧益說世務用世
之士益喜之舉人施侃者雅喜山人而病其放說之
居山人然之買田苕溪之傍又說之婚則婚侃妻妹
張氏是時建業劉麟霓與吳克陸崐暨山人結社遊
號苕溪五隱山人始講吾儒性命之學無何病卒年

三十七

李夢陽太
白山人傳

王汝霖字九谷華陰人性孝友博學有文名避跡華陰山之麓以詩賦自娛嘉靖登極詔求隱逸有司累薦不起台府高其節贈匾旌廬著有松隱漫稿草木靈

異錄

賈志

馬天章字季襄三原人少從學於溫恭毅立志端亮孝事孀母善詩賦尤工篆隸栖遲衡門不求聞達人謂烟姿霞韻既有田遊巖復有馬季襄實先後輝映云

三原志

梁文映三原人明經溫恭毅居總憲欲薦於朝文映固

辭酣歌退隱人高其節

三原志

董旭兆長安人讀書彈琴淡於世味草書得二王遺意

以布衣終

賈志

王之翰字宗卿華陰人少司馬之良之兄也之良官南
贛巡撫治績卓然之翰獨淡於榮利教授生徒有貧
者輒資給之笑傲林泉不治生產時人擬之韋敬遠

云子弘睿戊午舉人不樂仕進築漱園華麓優游其

間以詩文自娛

賈志

劉鉦寇永清俱中部人鉦萬厯戊午舉人官保定通判
永清天啟辛酉恩選官汾州同知皆以清介耿直不
能俯仰隨時掛冠歸里鉦卜居於煖泉谷永清隱於
邑東龍灣之陽布衣糲飯彈琴著書以自娛足跡不

入城市人並美之鉦子世諫舉明經亦高節不仕

賈志

張鑛張鑛中部人俱舉明經鑛任武邑縣知縣不樂為

吏即解印歸屏跡自晦終身不出鑣授通判不就官

卜居北原貧窘蔬食毫無愠色時稱為兩逸士

賈志

楊清張暨辰俱宜君人清以恩選赴廷對時魏璫方煽

清拂袖西歸隱身不出植花種竹飄飄然有遺世之

思暨辰嘗從馮少墟講學見朝政日紊乃杜門晦迹

歲當舉明經不應布袍蔬食窮約終身

賈志

惠及岐清澗人閉戶讀書不計功名或手持一卷笑傲

山水間自謂羲皇上人尤喜施予弗事產業及貢期

不就廷對林泉自適隱居終身

清澗志

師功凱字雲菴清澗人天性孝友有隱志不求聞達少

慕黃老之術居華山以醫活人弗責報夢帝錫以佳

嗣果生子遂謝絕人世遍遊名山不返

清澗志

張曰炳字晦叔同州人知府守訓季子性醇篤好學凡

圖緯書數至稗官醫卜靡不綜攬恬於勢利不就有

司試或諷之傲然不屑與馬林友善日夕揚扞古文

辭郡中風雅一振為文典古華瞻卓有矩矱著張晦

叔詩集八卷武成考一卷

同州志

費甲鑄字子范咸寧人為人曠逸不羈植竹築圃以丘壑自怡賓客往來接談忘倦獨不喜談世務事兄甲鏹尤盡禮好吟詠工書畫所著有西湖草行於世

賈志

家遠遁

賈志

晉國柱字擎衡長安人少受講於馮恭定以闕變高隱卒之日門人謚曰貞孝先生時同時高隱身不仕者

邵陽訓導党國柱扶風人代州知州党琉城固人華陰王弘學潼關楊賓楊嘗有辭貢文當事者高其義

讓

賈志

魏淵淵字空空隱居華嶽性朴誠恬靜甘淡泊絕口不言世務足不出山者三十餘年後其子以淵淵老三至嶽頂欲迎還就養淵淵決志不歸其子泣請移綿山乃許之終不至家後無疾而卒

賈志

劉紱中部人力行篤學苦志清修舉明經不仕家貧自

甘不受餽遺為廬於沮水之旁教受生徒學者稱為

許西先生

中部志

流寓

周

太師疵少師疆武王東觀兵歸居二年太師疵少師疆

抱其樂器而奔周

史記周本紀

甯戚衛人居約時客遊於秦郿有遺跡

賈志

郿東南有村

曰甯曲土厚泉深有流水繞於門庭之間僉曰此齊

相甯戚所導水也故宅遺址猶有存者

金高襄食水碑記按甯

戚飯牛歌全是倦游歸來語意則流寓秦邦亦當日應有之事今鄆縣以堡名甯曲非無自也至縣志云甯戚有相牛經一卷傳之百里奚後奚得此以要秦穆公則近於荒誕矣

夷吾晉侯使賈華伐屈夷吾不能守盟而行將奔狄卻

芮曰不如之梁梁近秦而幸焉乃之梁

左傳

晉太子圉為質於秦秦妻之子圉將逃歸謂嬴氏曰與子歸乎對曰子晉太子而辱於秦子之欲歸不亦宜乎寡君之使婢子侍執巾櫛以固子也從子而歸棄

君命也不敢從亦不敢言遂逃歸

左傳

晉公子重耳之及於難也晉人伐諸蒲城蒲城人欲戰重耳不可曰保君父之命而享其生祿於是乎得人有人而校罪莫大焉吾其奔也遂奔狄從者狐偃趙衰顛頡魏武子司空季子狄人伐廐咎如獲其二女叔隗季隗納諸公子公子取季隗生伯儵叔劉以叔隗妻趙衰生盾處狄十二年而行及楚楚子乃送諸秦秦伯納女五人懷嬴與焉奉匜沃盥既而揮之怒

曰秦晉匹也何以卑我公子懼降服而囚他日公享
之子犯曰吾不如衰之文也請使衰從公子賦河水
公賦六月趙衰曰重耳拜賜公子降拜稽首公降一
級而辭焉衰曰君稱所以佐天子者命重耳重耳敢

不拜

左傳 按重耳從亡五
人史記有先軫無顛頤

由余戎王使由余於秦由余其先晉人也亡入戎聞繆
公賢故使由余觀秦繆公問內使廖曰鄰國有聖人
敵國之憂也由余賢奈何廖曰君為由余請以疏其

間留而莫遣以失其期戎王怪之必疑由余君臣有
間乃可虜也繆公因與由余曲席而坐傳器而食問
其地形與其兵勢終年乃歸由余

史記秦本紀

晉先蔑奔秦

春秋

晉襄公卒靈公少晉人以難故欲立長

君晉人使先蔑士會如秦逆公子雍秦康公送公子
雍於晉多與之徒衛穆嬴日抱太子以啼於朝宣子
與諸大夫皆患穆嬴且畏偁乃背先蔑而立靈公敗
秦師於令狐先蔑奔秦士會從之先蔑之使也荀林

父止之弗聽及亡荀伯盡送其帑及其器用財賄於秦曰為同寮故也士會在秦三年不見士伯其人曰能亡人於國不能見於此焉用之士季曰吾與之同罪非義之也將何見焉及歸遂不見晉人患秦之用士會也使魏壽餘偽以魏叛者以誘士會執其帑於晉使夜逸請自歸於秦秦伯許之履士會之足於朝秦伯師於河西魏人在東壽餘曰請東人之能與夫二三有司言者吾與之先使士會士會辭曰晉人虎

狼也若背其言臣死妻子為戮無益於君不可悔也
秦伯曰若背其言所不歸爾帑者有如河乃行繞朝
贈之以策曰子無謂秦無人吾謀適不用也既濟魏

人譟而還秦人歸其帑其處者為劉氏

左傳

四飯缺適秦播鼗武入於漢

論語

按朱註云漢漢中此漢中在興漢之間即禹

貢嶠家導漾東流為漢處也春秋之末地應屬楚然
武避地而去萍踪無定云入漢者亦猶詩咏伊人在
水一方之意未知其稅駕何所安知不
為褒汚之遊故與入秦之缺並載之

卜商字子夏衛人少孔子四十四歲孔子既沒子夏居

西河教授為魏文侯師

史記仲尼弟子本傳

所居石室在飛浮

山當河之中隨水消長為高下

賈志

扁鵲勃海郡鄭人也姓秦氏名越人視病盡見五藏癥

結名聞天下來入咸陽聞秦人愛小兒即為小兒醫

隨俗為變秦太醫令李醯自知伎不如扁鵲使人刺

殺之至今天下言脉者由扁鵲也

史記本傳

蘇秦者東周洛陽人也西至秦秦孝公卒惠王方誅商

鞅疾辨士弗用

史記本傳

蘇秦說秦王書十上而說不行

黑貂之裘敝黃金百鎰盡資用乏絕去秦而歸

戰國策

太子完頃襄王使太子完入質於秦秦留之數年王病

太子不得歸

史記春申君傳

楚王子質於秦不得歸作思歸

歌曰去千乘之家國作咸陽之布衣

怨錄

燕太子丹者故嘗質於趙而秦王政生於趙其少時與

丹驩及政立為秦王而丹質於秦秦王遇燕太子丹

不善故丹怨而亡歸

史記刺客傳

燕太子丹質於秦秦遇

之無禮不得意欲歸秦王不聽謬言曰令烏頭白馬

生角乃可丹仰天歎烏即白頭馬為生角秦王不得

已而遣之

冊府元龜

漢

陸賈楚人以客從高祖定天下有口辯常使諸侯孝惠
帝時呂太后用事陸生自度不能爭乃病免以好時
田地善可家焉有五男乃出所使越得橐中裝賣千
金分其子子二百金令為生產陸生常安車馬四馬從
歌舞鼓琴瑟侍者十人寶劍直百金謂其子曰與汝

約過汝汝給吾人馬酒食極飲十日而更所死家得
寶劍車騎侍從者一歲中往來過他客率不過再三
過數見不鮮無久恩公為也竟以壽終

史記
本傳

司馬季主楚人卜於長安市宋忠賈誼同與之市游
卜肆中司馬季主閒坐弟子三四人侍方辯天地之
道日月之運陰陽吉凶之本二大夫再拜謂司馬季
主使弟子延之坐坐定司馬季主復理前語數千言
宋忠賈誼瞿然而悟獵纓正襟危坐曰先生何行之

汚司馬季主曰騏驥不與罷驢為馬鳳凰不與燕雀
為羣賢者亦不與不肖者同列公等喁喁何知長者
之道乎於是再拜而辭

史記日
者列傳

灌夫字仲孺潁陰人為中郎將數月坐法去後家居長

安長安中諸公莫弗稱之

史記灌
夫列傳

李廣者隴西成紀人為將軍下吏當斬贖為庶人居
數歲廣家與故潁陰侯孫屏野居藍田南山中射獵
嘗夜從一騎出從人田間飲還至霸陵亭霸陵尉醉

呵止廣廣騎曰故李將軍尉曰今將軍尚不得夜行

何乃故也止廣宿亭下

史記本傳

司馬相如者蜀郡人也字長卿口吃而善著書常有消渴疾與卓氏婚饒於財其進仕宦未嘗肯與公卿國家之事稱病閒居不慕官爵既病免家居茂陵天子曰相如病甚可往從悉取其書若不然後失之矣使所忠往而相如已死

史記本傳

相如將聘茂陵人女為妾

卓文君作白頭吟以自絕相如乃止

西京雜記

朱買臣字翁子吳人家貧隨上計吏為卒將重車至長
安詣闕上書書久不報待詔公車糧用乏上計吏卒
更乞匄之邑子嚴助貴幸薦買臣拜中大夫坐事免
久之召待詔拜會稽太守初買臣免待詔常從會稽
守邸者寄居飯食拜為太守買臣衣故衣懷其印綬
步歸郡邸直上計時會稽吏方相與羣飲買臣入室
中守邸與共食食且飽有頃長安廐吏乘駟馬車來
迎買臣遂乘傳去

漢書
本傳

任安榮陽人少孤貧困為人將車之長安留求事為小吏未有因因占著名數家於武功武功扶風西界小邑也谷口蜀剗道近山安以為武功小邑無豪易高也安留代人為求盜亭父後為亭長邑中人出獵安為分麋鹿雉兔部署老小當壯劇易處衆人皆喜曰任少卿分別平有智畧明日復合會會者數百人任少卿曰某子甲何為不來乎諸人皆怪其見之疾也

後乃為衛將軍舍人

史記田叔傳

王吉字子陽琅邪臯虞人少時學問居長安東家有大棗樹垂吉庭中吉婦取棗以啖吉吉後知之乃去婦東家聞而欲伐其樹鄰里共止之因固請吉令還婦里人為之語曰東家有樹王陽婦去東家棗完去婦復還其厲志如此

漢書本傳

樓護字君卿齊人父世醫也護少隨父為醫長安出入貴戚家護誦醫經本草方術數十萬言長者咸愛重之共謂曰以君卿之材何不宜學乎繇是辭其父學

經傳為京兆吏數年甚得名譽護為人短小精辯議
論常依名節聽之者皆竦與谷永俱為五侯上客母
死送葬者致車二三千兩閭里歌之曰五侯治喪樓
君卿舉方正為諫大夫擢天水太守復為廣漢太守

漢書

本傳

蔡順字君仲汝南人少孤事母至孝王莽末中原大亂
順奉母西入關遂居華西廣鄉原即今渭南東原也
會歲饑順採桑椹供養赤眉賊向關中順遭之賊眾

見其桑椹黑赤異器問故順曰黑者供母赤者自食
賊驚曰孝子也乃遺米三斗牛一蹄禮之使歸食母

西安府志

承宮字少子琅邪姑幕人少孤勤學不倦遭天下喪亂

遂將諸生避地漢中

後漢書本傳

孔季彥魯人父臨晉令禧卒於官遂畱華陰有答張太

常備德君子及楊太尉震大儒之問

西安府志

蔡邕字伯喈陳畱人初邕與司徒劉郃素不相平叔父

衛尉質又與將作大匠楊球有隙球即中常侍程璜
女夫也璜使人飛章言邕質數以私事請託於郤郤
不聽於是詔下邕質於洛陽獄劾棄市事奏中常侍
呂強愍邕無罪請之帝有詔減死一等與家屬髡鉗
徙朔方楊球使客追路刺邕客感其義皆莫為用又
賂其部主使加毒害所賂者反以其情戒邕故每得
免居五原安陽縣邕前在東觀與盧植韓說等撰補
後漢記因上書自陳奏其所著十意帝嘉其才高會

明年大赦乃宥邕還本郡邕自徙及歸凡九月焉

後漢

書本傳

丁蘭河內人寓居平陵後人名其居地曰孝子門

馬志

李堅曹植輦舞詩序云漢靈帝鼓吹有李堅者能輦舞
遭世荒亂播越關西隨將軍段熲先帝聞其舊伎下

書召堅堅年踰七十云

晉書樂志

王粲字仲宣山陽高平人曾祖襲祖暢皆為漢三公獻
帝西遷粲徙長安左中郎將蔡邕見而奇之時邕才

學顯著貴重朝廷常車騎填巷賓客盈坐聞粲在門
倒屣迎之粲年即幼弱容狀短小一坐盡驚竈曰此
王公孫有異才吾不如也吾家書籍文章盡當與之
年十七司徒辟詔除黃門侍郎以西京擾亂皆不就

三國魏
志本傳

青牛先生初平中山東人有青牛先生字正方客三輔
曉知星厯風角鳥情常食青箱光華年似五六十者
人或親識之謂已百餘歲矣建安十六年三輔亂南

入漢中漢中壤入蜀

三國志管志傳注

寒貧者本姓石字德林安定人建安初客三輔是時長安有宿儒樂文博者門徒數千德林亦就學始精詩書後好內事於衆輩中最玄默十六年關中亂南入漢中不治產業不畜妻孥嘗讀老子五千文及諸內書晝夜吟咏二十五年漢中破隨衆還長安遂癡愚不復識人食不求味冬夏衣敝布衣體如無所勝目如無所見獨居窮巷小屋無親里人與之衣食不肯取郡

縣以其鰥窮給廩日五升食不足頗行乞乞不取多人問其姓字不肯言因號之曰寒貧或素有與相知者往存恤之輒拜跪由是人謂其不癡

魏畧

晉

周虢字孟威少有節操歷梓潼太守寧康初符堅將楊安寇梓潼虢遣送母妻為堅將邀而護之虢遂降於安堅欲以為尚書郎虢曰蒙國厚恩以至今日老母見獲失節於此母子獲全秦之惠也雖公侯之貴不

以為榮況郎任乎堅乃止太元三年號潛至漢中堅

追得之後徙於太原

晉書本傳

北魏

賀狄干代人登國初道武遣狄干致馬千匹結婚於姚
萇會萇死興立止狄干而絕婚干在長安因習讀書

史通論語尚書諸經舉止風流有似儒者

北史本傳

寇讚字奉國上谷人因難徙居馮翊萬年姚泓滅秦雍

人千有餘家推讚為主歸順拜魏郡太守

魏書本傳

胡叟字倫許安定臨涇人少聰慧好屬文以姚氏將衰
遂入長安觀風化隱匿名行懼人見知時京兆韋祖
思少閑典墳多蔑時彥待叟不足叟拂衣而出祖固
留之遂歸主人賦韋杜二族一宿而成時年十八人
皆竒其才畏其筆叟孤飄坎壈未有仕路遂入漢中
刺史馮翊吉翰頗相禮接授末佐不稱懷未幾入蜀

北史
本傳

游明根字志遠雅從祖弟廣平任人幼年遭亂為櫟陽

王氏奴主使牧羊明根以壺漿倩人書字路邊書地
學之長安鎮將竇瑾見之呼問知其姓名乃告雅雅

贖之

北史游雅傳

馮熙信都人生於長安為姚氏魏母所養以叔父樂陵
公邈因戰入蠕蠕魏母攜熙逃避至氐羌中撫育年
十二好弓馬有勇幹氏羌皆歸附之魏母見其如此
將還長安始就學問從師受孝經論語好陰陽兵法
及長遊華陰河東二郡間性汎愛不拘小節人無士

庶來則納之後至侍中太師

魏書外
戚傳

李預字元凱太和初歷馮翊太守解郡遂居長安羨古
人飡玉法乃採訪藍田躬往攻掘得若環璧雜器形
者大小百餘頗有麤黑者亦篋盛以還至而觀之皆
光潤可玩乃推七十枚為屑食之經年云有效驗而
世事寢食皆不節又好酒損志及病篤謂妻子曰吾
尸體必當有異勿速殯令後人知殮服之妙時七月
中旬長安毒熱預停尸四宿而體色不變妻常氏以

玉珠二枚哈之因噓其口都無穢氣舉斂於棺堅直

不傾

北史李
先傳

薛拔

辯孫汾
陰人

尚文成女西河長公主拔弟子驎駒舉秀

才除中書博士始拔尚主有賜田在馮翊驎駒徙居

之遂家於馮翊之夏陽

北史
本傳

李昶頗丘臨黃人父遊有才行屬亂奔江左昶於太祖

世已當樞要及晉公護執政委任如舊昶以父在江

南身寓闕右自少及終不飲酒聽樂時論以此稱焉

周書
本傳

檀翥字鳳翔高平人好讀書善屬文能鼓瑟司州牧城陽王元徽以翥為從事非其好也尋謝病客遊三輔

周書李
昶傳

蕭大圜梁簡文帝子也大寶元年封樂梁郡王元帝改封晉熙郡王子謹軍至元帝令大圜兄大封克使請和大圜副焉其實質也出至軍所信宿元帝降魏恭帝二年客長安太祖以客禮待之并賜田宅奴婢牛

馬粟帛等俄而開麟趾殿招集學士大園預焉

周書本傳

王褒字子淵琅琊臨沂人有重名於江左大軍征江陵元帝出降褒出見柱國于謹謹甚禮之褒曾作燕歌行妙盡闕塞寒苦之狀元帝及諸文士並和之競為淒切之詞至此方驗褒與王克劉歆宗懔等數十人俱至長安太祖喜曰昔平吳之利二陸而已今羣賢畢至可謂過之又謂褒及王克曰吾王氏甥也卿等並吾之舅氏當以親戚為情弗以去鄉介意於是授

褒克等車騎大將軍儀同三司資餽甚厚褒等亦並
荷恩賜忘其羈旅初褒與梁處士汝南周弘讓相善
及弘讓兄弘正自陳來聘高祖許褒等通親知音問
褒贈弘讓詩并致書

周書
本傳

庾信字子山南陽新野人梁元帝即位加散騎常侍來
聘於我屬大軍南討遂留長安江陵平陳氏與朝廷
通好南北流寓之士各許還其舊國陳氏請信等十
數人高祖惟放王克殷不害等信及褒並留不遣世

宗高祖雅好文學特蒙恩禮信雖位望通顯常有鄉

關之思乃作哀江南賦以致其意

周書本傳

殷不害字長卿陳郡長平人江陵陷與王褒庾信俱入

長安自是蔬食布衣枯槁骨立見者哀之大建七年

自周還朝其還也周留其長子僧首因居關中禎明

三年京城陷僧首來迎不害道病卒

陳書本傳

姚察吳興武康人父上開府僧垣知名察於大建初除

散騎侍郎左通直報聘於周初梁季淪沒僧垣入於

長安至是得與僧垣相見將別之際絕而復蘇見者

莫不歎歔

陳書姚察傳

徐文遠偃師人父徹梁秘書郎尚元帝女安昌公主而生文遠屬江陵陷被虜於長安安貧無以自給其兄休嚮書為業文遠日閱書於肆博覽五經尤精春秋

左氏傳

舊唐書儒學傳

劉行本沛人起家武陵國常侍遇蕭修以梁州北附遂與叔父璠同歸於周寓居京兆之新豐每以諷讀為

事

隋書
本傳

隋

蕭允字叔佐蘭陵人後主拜光祿大夫及隋師濟江遷
於關右是時朝士至長安者例並授官惟允與尚書
僕射謝朏辭以老疾隋文帝義之並厚賜錢帛尋以
疾卒於長安

陳書
本傳

孔紹安越州山陰人少與兄紹新俱以文詞知名陳亡
入隋徙居京兆鄠縣閉門讀書誦古文集數十萬言

外兄虞世南歎異之紹新嘗謂世南曰本朝淪陷分
從湮滅但見此弟竊謂家族不亡矣

舊唐書
文苑傳

唐

盧照鄰范陽人拜新都尉因疾去官處太白山中以服

餌為事

舊唐書
文苑傳

照鄰始去新都寓於京城鄱陽公主

之廢府時詔徵太白山隱士孫思邈亦居此府思邈
時年九十餘視聽不衰照鄰自傷年纔強仕而沈疾

困憊乃作病梨樹賦

冊府元龜

員半千字榮期齊州人累封平原郡公樂山水自放開
元九年遊堯山沮水間愛其地遂定居卒年九十四

即葬焉

唐書
本傳

王維字摩詰太原祁人得宋之間藍田別墅在輞口輞
水周於舍下與道友裴迪浮舟往來彈琴賦詩嘯詠
終日嘗聚其田園所為詩號輞川集

舊唐書
本傳

維母亡

表輞川第為寺

唐書
本傳

摩詰少以詞學知名有高致信

佛理藍田南置別業以水木琴書自娛善畫山水人

物嘗於清源寺壁畫輞川圖巖岫盤鬱雲水飛動

圖畫

見聞志

是圖蓋維平生得意畫也予觀唐史暨維集所

謂竹館柳浪等皆可考江山雄勝草木潤秀使人排

徊撫卷而忘倦浩然有結廬終焉之想而不知秦之

非吾土也物之移人觀者如是

劉因輞川圖記

杜甫字子美其先自襄陽徙河南甫舉進士不第困長

安會祿山亂天子入蜀甫避走三川肅宗立自鄜州

羸服欲奔行在為賊所得至德三載亡走鳳翔謁上

拜右拾遺時所在寇奪甫家寓廊廡彌年寤寢孺弱至
餓死因許甫自往省視從還京師出為華州司功叅

軍闕輔饑輒棄官去

唐書杜甫傳

牛僧孺八代祖弘相隋封奇章郡公贈文安侯長安南
下杜樊鄉東文安有隋氏賜田數頃書千卷尚存公

年十五依以為學數年業就

杜樊川集

張詢南海人不第後流寓長安以畫自適

圖繪寶鑑

張策字少逸河西燉煌人少好浮圖之說乃落髮為僧

居長安慈恩寺黃巢犯長安策乃返初服奉父母以避亂邠州王行瑜辟觀察支使晉王李克用攻行瑜策與婢肩與其母東歸

五代史本傳

宋

呂贊汲郡人為比部郎中後知巴西縣致仕因葬京兆

藍田遂家焉

河南通志

邵雍洛陽人嘗占籍商洛結廬天柱山商守給天柱山

戶帖與之唱和又寓居鳳州嘗登郡樓賦詩而去

馬志

堯夫遊商愛南秦川風土卜居八年與州守宋郎中
友善時以詩酒酬答一日州守延賞牡丹時章惇為
商洛令議論縱橫堯夫言見蓓蕾而知花之高下者
知花之次也見根蘖而知花之高下者知花之上也

因陳天人理數之學章愧服

商州志

呂希純河南人紹聖初以屯田員外郎分司南京後居

金州杜門讀書不以夷險縈心

馮志

金

李懋不知何許人有異術正大間游京兆行省完顏哈

達愛其術

金史本傳

李汾字長源平晉人系出雁門避亂入關京兆尹子容
愛其才招致門下留二年去之涇州謁張公信甫一
見即以上客禮之自是游道日廣關中無一人敢與
相軒輊者長源以詩為專門之學其所得如三輔樓
臺失歸燕上林花木怨啼鵲等句同輩作七言詩者
皆不及也有關中往來詩十數首道其流離世故妻

子凋喪道塗萬里奔走狼狽之意雖詞旨危苦而耿

耿自信者故在

中州集

元

毛沖蜀人原任普潤縣尹後謝政隱於岐山周公廟談

詩論禮不求聞達鄰邑諸向道者多與之遊居數十

年還籍

岐山志

明

常存字惟德開平王遇春從子累功授親軍侍衛指揮

洪武初從遇春入關以久在兵間思脫塵網遂謝去

寓居蒲城之白堂山賢相鄉

西安府志

羅性字子理泰和人洪武初中鄉貢進士授德安府同知坐擅用棗木染軍衣為陳寧所劾謫戍西安行橐枵虛怡然就役既至達官貴人咸加敬禮諸生從學甚衆是時四方老師碩儒在西安者數十人吳中鄒奕獨曰合吾輩所讀書庶幾羅先生之半

名山藏

晉漢臣洪洞人愍王時為紀善慕終南之勝遂卜居江

村後陞審理卒於王事葬村西

賈志

石無用字琴月南安人善詩尤工書往來江漢蒲團杖

笠片雲孤鶴寓洋之鄧都山五雲宮

洋縣志

俞安期字羨長吳江人寓居京兆詩名重海內著有琴

琴閣集雍勝畧并纂唐類函諸書

賈志

祝世喬字子遷江西金谿人方襁褓時父神谷遠遊久
未歸世喬年十五獨行尋父歷楚及秦數瀕危殆先
是楚有楊某者德神谷療其疾思報之及見世喬亟

欲妻以女世喬辭去之西秦西秦山高地寒值嚴冬
數瘕無完膚自分必死久之乃遇父於鞏昌西和道
中父子相抱而泣觀者咸為酸感奉父至高陵始卜
室焉世喬雖窮途孤旅讀書不輟後以選貢授南康
通判佐郡有聲移家隸籍咸寧

馮少
墟集

方伎

周

偃師西域人周穆王西巡將還未及中國有獻工人名

偃師王問曰何能偃師曰臣惟命所試然臣已有所造願王先觀之王曰日與俱來吾與若俱觀之翼日偃師謁見王王曰若與偕來者何人耶對曰臣所造能倡者王驚視之趣步俯仰信人也巧夫領其頤則歌合律捧其手則舞應節千變萬化惟意所適王以為實人也與盛姬內御並觀之技將終倡者瞬其目而招王之左右侍妾王大怒立欲誅偃師偃師大懼立剖散倡者以示王皆傅會革木膠漆白黑丹青之

所為王諦料之內則肝膽心肺脾腎腸胃外則筋骨
支節皮毛齒髮皆假物也合會復如初王試廢其心
則口不能言廢其肝則目不能視廢其腎則足不能
步王始悅而歎曰人之巧乃可與造化同功乎詔貳
車載之以歸

列子

偃師縛草作人能為之走

文苑彙雋按方伎

非秦產者不錄但偃師來自遐方入貢之後供奉周
京終老於此直省各志既無從收錄入之流寓生平
術藝又湮沒不彰故特與土著並列於篇自周
秦以迄隋唐遠人以方伎傳者凡得五人云

商南本黃帝之昆孫以地得姓周初封子男於商精數

學周髀衍其說為算經國語曰司商

賈志

卜徒父

秦太卜

僖公十五年秦伯代晉卜徒父筮之吉涉

河侯車敗詰之對曰大吉三敗必獲晉君其卦遇蠱

曰千乘三去三去之餘獲其雄狐夫狐蠱必其君也

蠱之貞風也其悔山也歲云秋矣我落其實而取其

材所以克也實落材亡不敗何待三敗及韓戰於韓

原秦獲晉侯以歸

左傳

卜招父

梁太卜

惠公之在梁也梁伯妻之梁嬴孕過期卜

招父與其子卜之其子曰將生一男一女男為人臣
女為人妾故名男曰圉女曰妾及子圉西質妾為宦

女馬

左傳

伯樂善相馬秦穆公謂曰子之年長矣子姓有可使求
馬者乎對曰臣之子皆下材也臣有所與九方臯此
其於馬非臣之下也穆公見之使行求馬三月而反
報曰已得之矣在沙丘穆公曰何馬對曰北而黃使
人往取之牡而驪穆公不悅謂伯樂曰敗矣子所使

求馬者物色牝牡尚弗能知又何馬之能知也伯樂
曰若臯之所觀天機也得其精而忘其粗若臯之相
馬乃有貴乎馬者也馬至果天下之良馬也

列子

醫緩

秦人

成公十年晉侯疾病求醫于秦秦伯使醫緩為

之未至公夢疾為二豎子曰彼良醫也懼傷我焉逃
之其一曰居肅之上膏之下若我何醫至曰疾不可
為也在肅之上膏之下攻之不可達之不及藥不至
焉不可為也公曰良醫也厚為之禮而歸之

左傳

醫和秦人昭公元年晉侯求醫於秦秦伯使醫和視之曰

疾不可為也是謂近女室疾如蠱非鬼非食疾心喪
志良臣將死天命不祐公曰女不可近乎對曰節之
天有六氣降生五味發為五色徵為五聲淫生六疾
六氣曰陰陽風雨晦明也分為四時序為五節過則
為菑陰淫寒疾陽淫熱疾風淫末疾雨淫腹疾晦淫
惑疾明淫心疾女陽物而晦時淫則生內熱惑蠱之
疾今君不節不時能無及此乎趙孟曰誰當良臣對

曰主是謂矣主相晉國於今年晉國無亂諸侯無
闕可謂良矣和聞之國之大臣榮其寵祿任其大節
有蓄禍興而無改焉必受其咎今君至於淫以生疾
將不能圖恤社稷禍孰大焉主不能禦吾是以云也
趙孟曰何謂蠱對曰淫溺惑亂之所生也於文四蟲
為蠱穀之飛亦為蠱在周易女惑男風落山謂之蠱
皆同物也趙孟曰良醫也厚其禮而歸之

左傳

醫均者秦之良醫也為宣王割瘕為惠王治痔皆愈張

子之背腫請治之曰背非吾背也任子治焉遂愈

子尸

秦

裂裔始皇元年騫霄國獻刻玉善畫工名夷使含丹青
以漱地即成魑魅及詭怪羣物之象刻玉為百獸之
形毛髮宛若真銘其臆前記以日月工人以指畫地
長百丈直如繩墨方寸之內畫四瀆五岳列國之圖
又畫為龍鳳騫翥若飛皆不點睛或點之必飛走始

皇嗟曰刻畫之形何得飛走使以淳漆各點兩玉虎
一眼睛旬日失之不知所在明年西方獻兩白虎各
無一目始皇發檻視之疑是先所失者乃刺殺之檢
其胸前果元年所刻玉虎也

拾遺記 按歷代
名畫記作裂夷

漢

周仁其先任城人以醫見景帝為太子時為舍人積功
遷至大中大夫景帝初立拜仁為郎中仁為人陰重
不泄常衣弊補衣溺袴故不為潔清以是得幸入卧

內於後宮秘戲仁常在旁上時問人仁曰上自察之
然亦無所毀景帝再自幸其家家陽陵上所賜甚多
然終常讓不敢受也諸侯羣臣賂遺終無所受武帝
立為先帝臣重之仁乃病免以二千石祿歸老於家

子孫咸至大官

漢書本傳

梧生

安陵卜者

袁盎家居多怪乃之梧生所問占

漢書袁盎傳按袁

盎家安陵

梧生秦時賢士善術者也

袁盎傳注

許博昌安陵人善陸博竇嬰好之常與居處其術曰方

畔揭道張張畔揭道方張究屈元高高元屈究張三
輔兒童皆誦之法用六箸以竹為之長六分或用二

箸博昌又作大博經一篇

西京雜記

蓋元

西域人

武帝平西域得胡人善蹴踘者蓋元便捷跳

躍帝好而為之羣臣不能諫

彈碁經序

徐禹

長安人

武帝元封七年歷紀廢壞廼造漢太初歷元

鳳三年太史令張壽王言黃帝調歷漢元年以來用

之今陰陽不調更歷之過詔課諸歷疏密長安徐禹

治太初歷第一壽王治黃帝調歷皆疏濶又言黃帝
至元鳳三年六千餘歲長安單安國安陵栢育治終
始言黃帝以來三千六百二十九歲不與壽王合故
歷本之驗自漢歷初起盡元鳳六年三十六歲而是

非堅定

漢書律
歷志

古掾曹

京兆人

學從橫揣摩弄矢擣丸樗蒲之術為都掾

史四十餘年善詆謾二千石隨以諧謔皆握其權要
而得其歡心趙廣漢為京兆尹黜之終於家京師排

戲皆稱古掾曹

西京雜記

毛延壽杜陵人陳敞平陵人劉白新豐人陽望下杜人
樊育長安人並永光建昭中畫手時元帝後宮既多
使圖其狀每披圖召見諸宮人競賂畫工錢帛獨王
嬙貌麗意不苟求工人遂為醜狀及匈奴求漢美女
上按圖召昭君行帝見昭君貌甚悔之而籍已定乃
窮其事畫工皆棄市籍其家貲皆巨萬毛延壽畫人
老少美惡皆得其正陳敞劉白並工牛馬飛鳥衆勢

但人物不及延壽陽望樊育亦善畫尤善布色

歷代名畫

記按本傳畫手共六人其一乃洛陽龔寬也以非秦產故不載

丁緩

長安巧工

常為滿燈七龍五鳳雜以芙蓉蓮藕之奇又

作卧褥香爐一名被中香爐本出房風其法後絕至

緩始更為之為機環轉運四周而爐體常平可置之

被褥故以為名又嘗作九層博山香爐鏤為奇禽怪

獸窮諸靈異皆自然運動又作七輪扇連七輪大皆

徑丈相連續一人運之滿堂寒顫

西京雜記

杜夫子

杜陵人

善奕棋為天下第一人或譏其費曰夫子

曰精其理者足以大裨聖教

西京雜記

篩翁者長安善相馬者也於邊郡求得駿馬騎以入市

去來人不見也後勞問之因請觀焉翁曰諸卿無目

不足示也

桓譚新論

山子道

馮翊人

博物志曰漢世馮翊山子道王九真郭凱

等善圍棋

三國志魏武帝本紀注

魏

馬鈞

扶風人

巧思絕世傳玄序之曰馬先生天下之名巧

也為博士居貧舊綾機五十綜者五十躡六十綜者六十躡先生患其喪功費日乃皆易以十二躡為給事中與常侍高堂隆驍騎將軍秦朗言及指南車明帝詔先生作之都內有地可為園患無水以灌之乃作翻車令童兒轉之灌水自覆更入更出其巧百倍於常其後人有上百戲者能設而不能動帝問可動否曰可動其巧可益否曰可益受詔作之以大木彫

構使其形若輪平地施之潛以水發設為女樂舞象
至令木人擊鼓吹簫作山嶽使木人跳丸擲劍緣絙
倒立出入自在百官行署春磨鬪雞變巧百端見諸
葛亮連弩曰巧矣未盡善也作之可令加五倍又患
發石車敵人之於樓邊懸濕牛皮中之則墮石不能
連屬而至欲作一輪縣大石數十以機鼓輪為常則
以斷懸石飛擊敵賊使首尾電至嘗試以車輪懸瓊
甃數十飛數百步先生之巧雖古公輸般墨翟王爾

近漢世張平子不能過也

魏志杜
襲傳注

晉

王彫

新平人

初苻堅即偽位彫陳說圖讖堅大悅以彫為

太史令嘗言於堅曰謹按讖云古月之末亂中州洪水大起健西流惟有雄子定八州此即三祖陛下之聖諱也又曰當有草付臣又土滅東燕破白虜氏在中華在表案圖讖之文陛下當滅燕平六州願徙汧隴諸氏於京師三秦大戶置之於邊地以應圖讖之

言堅訪之王猛猛以彫為左道惑衆勸堅誅之彫臨
刑上疏曰臣以趙建武四年從京兆劉湛學明於圖
記謂臣曰新平地古顓頊之墟里名曰雞閭記云此
里應出帝王寶器其名延壽寶鼎顓頊有云河上先
生為我隱之於咸陽西北吾之孫有草付臣又土應
之湛又云吾嘗齋於室中夜有流星大如半月落於
此地斯蓋是乎願陛下誌之乎七州之後出於壬午
之年至是新平人得之以獻器銘篆書文題之法一

為天王二為王后三為三公四為諸侯五為伯子男
六為卿大夫七為元士自此以下考載文記列帝王
名臣自天子王后內外次序上應天文象紫宮布列
依玉牒版辭不違帝王之數從上元人皇起至中元
窮於下元天地一變盡三元而止堅以彫言有徵特

贈光祿大夫

晉書符
堅載記

北魏

周澹鄴人多方術尤善醫藥為太醫令太宗嘗苦風頭

眩澹治得愈由此見寵位至特進賜爵成德侯

魏書本傳

趙胡

京兆人

宣武靈皇后胡氏司徒國珍女也產之日赤

光四照京兆山北縣有趙胡者善卜相國珍問之胡云賢女有大貴之表方為天地母生天地主勿過三

人知也

魏書皇后傳

王伯達

扶風人

盧淵年四十嘗詣長安將還諸相餞送者

五十餘人別於渭北有相者扶風人王伯達曰諸君

皆不如盧郎雖位不副實然德聲甚盛望踰公輔

後三十餘年當制命關右願不相忘後淵果為安南將軍督關右諸軍事相者年過八十詣軍門請見言

敘平生未幾拜儀曹尚書

魏書本傳

隋

韋鼎字超盛京兆杜陵人少通脫博涉經史明陰陽逆刺尤善相術仕梁遭父憂哀毀過禮殆將滅性侯景之亂兄昂卒於京城鼎負屍出寄於中興寺求棺無所得鼎哀憤慟哭忽見江中有物流至鼎異之往見

乃新棺也因以充殮元帝聞之以為精誠所感侯景
平歷中書侍郎陳武帝在南徐州鼎望氣知其當王
遂寄孥焉因謂曰後四歲梁其代終天之歷數當歸
舜後明公天縱神武繼絕統者無乃是乎帝大喜因
而定策及受禪拜黃門侍郎轉廷尉卿大建中為聘
國主使至德初鼎盡貨田宅寓居僧寺友人問其故
答曰江東王氣盡於此矣吾與爾當葬長安期運將
及故耳初鼎之聘周也嘗與高祖相遇鼎謂高祖曰

觀公容貌故非常人神鑒深遠亦非羣賢所逮歲一
周天老夫當委質願深自愛及陳平待遇甚厚高祖
命鼎還杜陵鼎考校昭穆自楚太傅孟以下二十餘
世作韋氏譜七卷開皇十二年除光州刺史以仁義
教導務弘清靜部內肅然咸稱其神

隋書
本傳

來和字弘順長安人少好相術所言皆驗高祖微時詣
和相和謂高祖曰公當王有四海及為丞相拜儀同
既受禪進爵為子和同郡韓則嘗詣和相和謂之曰

後四五當得大官人初不知所謂則至開皇十五年五月而終人問其故和曰十五年為三五加以五月為四五大官擲也和言多此類著相經四十卷

隋書本傳

楊伯醜馮翊人好讀易隱於華山開皇初被徵入朝見公卿不為禮無貴賤皆汝之人不能測也高祖召與語竟無所答賜之衣服至朝堂捨之而去嘗有張永樂者賣卜京師伯醜每從之遊永樂為卦有不能決者伯醜輒為分析爻象尋幽入微永樂嗟服自以為

非所及也伯醜亦開肆賣卜國子祭酒何妥嘗詣之
論易聞妥言倏然而笑曰何用鄭玄王弼之言乎久
之微有辨答所說辭義皆異先儒之旨而思理玄妙
論者以為天然獨得非常人所及也竟以壽終

隋書
本傳

臨孝恭京兆人明天文算術高祖甚親遇之每言災祥
之事未嘗不中上因令考定陰陽書官至上儀同

隋書

本傳

宇文愷字安樂

忻弟夏州人

家世武將諸兄並以弓馬自達

愷博覽書記解屬文多伎藝高祖踐祚詔領營新都
副監高頴雖總大綱凡所規畫皆出於愷上建仁壽
宮拜仁壽宮監煬帝即位遷都洛陽以愷為營東都
副監尋遷將作大匠愷揣帝心宏侈於是東都制度
窮極壯麗帝大悅之進位開府拜工部尚書及帝北
巡欲誇戎狄愷為大帳其下坐數千人帝大悅又造
觀風行殿上容侍衛者數百人離合為之下施輪軸
推移倏忽有若神功帝彌悅前後賞賚不可勝紀卒

謚曰康

隋書本傳

何稠字桂林國子祭酒妥之兄子父通善琢玉江陵平
隨妥入長安開皇中累遷大府丞稠博覽古圖多識
舊物波斯嘗獻金線綿袍組織殊麗上命稠為之稠
錦成踰所獻者上甚悅時中國久絕琉璃作匠人無
敢措意稠以綠瓷為之與真不異尋加員外散騎侍
郎開皇末桂州俚李光仕為亂詔稠討之以勲授開
府仁壽初文獻皇后崩稠與宇文愷參典山陵制度

稠性少言善候上旨由是漸見親昵大業初煬帝將幸揚州敕稠討閱圖籍造輿服羽儀送至江都稠於是營黃麾三萬六千人仗及車輿輦輅皇后鹵簿百官儀服依期而就送於江都帝善之以稠守太府卿領少府監遼東之役帝遣稠造橋二日而就初稠制行殿及六合城至是帝於遼左與賊相對夜中施之高麗望見謂若神功稍加至右光祿大夫從幸江都遇宇文化及亂歸於大唐授少府監卒

北史本傳

唐

李淳風岐州雍人父播仕隋棄官為道士號黃冠子以
論譔自見淳風幼爽秀通羣書明步天歷算貞觀初
以將仕郎直太史局制渾天儀詆撫前世得失遷太
史丞太宗得秘讖言唐中弱有女武代王以問淳風
對曰其兆既成已在宮中又四十年而王夷唐子孫
且盡帝曰我求而殺之奈何對曰天之所命不可去
也徒使疑似之戮淫及無辜且四十年而老老則仁

雖易姓不能絕唐若殺之復生壯者則陛下子孫無遺種矣帝采其言遂止淳風於占候吉凶若節契然當世術家意有鬼神相之非學習可致終不能測也以勞封樂昌縣男撰麟德歷代戊寅歷候者推最密自秘閣郎中復為太史令卒

唐書本傳

閻讓字立德以字行萬年人父毗為隋殿內少監本以藝進故立德與弟立本皆機巧有思武德初為秦王府士曹叅軍遷尚衣奉御製袞冕六服腰輿傘扇咸

有典法貞觀初歷將作少匠護治獻陵拜大匠即洪
州造浮海大船五百艘遂從征遼攝殿中監規築土
山破安市城師還至遼澤淖不可通立德築道為橋
梁無留行帝悅賜予良厚又營翠微玉華二宮擢工
部尚書永徽五年領徒四萬治京城卒諡曰康立本
顯慶中以將作大匠代立德為工部尚書總章元年
拜右相初太宗與侍臣泛舟春苑池見異鳥容與波
上悅之詔坐者賦詩而召立本侔狀閣外傳呼畫師

閻立本時已為主爵郎中俯伏池左研吮丹粉望坐者羞悵流汗歸戒其子曰吾文辭不減儕輩今獨以畫見名與廝役等若曹慎毋習然性所好雖被屈亦不能罷也既輔政無宰相器時姜恪以戰功擢左相故時人有左相宣威沙漠右相馳譽丹青之嘲謚文貞立德孫知微為豹韜衛將軍武后時突厥默啜請和親后遣知微攝春官尚書護送武延秀聘其女默啜怒非天子子因延秀挾知微入寇朝廷以知微賣

國夷其族子則先以武三思壻免死玄宗在藩時以善割蒙寵開元中有司奏擬供奉姚崇以為則先刑戮家不可留京師詔曰朕在外日嘗驅使宜令供奉

唐書
本傳

尉遲乙僧土火羅國胡人也貞觀初其國王以丹青巧妙薦之闕下今慈恩寺塔前面中間功德义凹堙花西面中間千手千眼菩薩精妙之極光宅寺七寶臺後面畫降魔象千怪萬狀實竒蹤也然其畫功德人

物花草皆是外國之象無中華禮樂威儀之德

唐畫斷

乙僧父跋質那時人以跋質那為大尉遲乙僧為小尉遲畫外國及菩薩小則用筆緊勁如屈鐵盤絲大則灑落有氣槩僧棕云外國鬼神奇形異貌中華罕見要之澄思用筆雖中華道殊然氣正跡高可與顧

陸為友

歷代名畫記

那羅爾娑婆

中天竺人

王元榮俘中天竺王阿羅那順詣闕

兼得術士那羅爾娑婆言壽二百歲太宗奇之館於

金鑑門內造延年樂後卒於長安

酉陽雜俎

馬祿師

武功人

善相長安主簿蕭璿與縣尉李嶠李全昌

同詣求決馬生云三人俱貴達大李少府位極人臣
聲名振耀南省官無虛任三人中書小李少府亦有
清資得五品以上要官位終卿監蕭主簿晚達亦大
富貴從今後十年家有大難兄弟並流唯公與一弟
獲全又十年之後方却得官遇大李少府在朝堂日
當得引用小李少府入省官時為其斷割後璿離長

安任作秘書郎則天既貴皇后王氏破滅蕭瑤是其
外姻舉家流竄嶺南唯瑤與弟瑗配遼東無何有處
置流移使出嶺南者俱死唯遼東者獲全兄弟二人
因亡命十餘年至神龍初再蒙洗滌其時李嶠作相
於街中忽逢瑤使人問是蕭秘書耶因謂之曰公豈
忘武功馬生之言乎於是擢用時小李少府作刑部
員外判還其家蕭公竟歷中外清要

定命錄

韋善俊雒南人武后時長齋奉道法飲其藥者病即愈

世稱為藥王

賈志

楊元禧

華陰人

為尚舍奉御善醫武后所信愛

唐書楊弘禮傳附

韋慈藏

京兆人

甄權後以醫顯者京兆韋慈藏

唐書甄權傳附

裴知古雍州人善樂律為太樂令神龍元年正月享太

廟樂作知古密語萬年令元行沖曰金石諧婉將有

大慶在唐室子孫乎是月中宗復位人有乘馬者知

古聞其嘶曰馬鳴哀主必墜死見新婚者聞珮聲曰

終必離訪之皆然

唐書李嗣真傳

嚴善思朝邑人父延通儒術該曉圖讖善思傳延業舉
銷聲幽數科及第隱居十年武后時擢監察御史方
酷吏構大獄以善思為詳審使平活八百餘人原千
餘姓長壽中按囚司刑寺罷疑不實者百人來俊臣
等誣以罪謫交趾得還是時李淳風死候家皆不效
詔善思以著作佐郎兼太史令聖歷二年熒惑入輿
鬼后問其占對曰大臣當之是年王及善卒長安中
熒惑入月鎮犯天關善思曰法當亂臣伏罪而有下

謀上之象歲餘張柬之等起兵誅二張中宗時皇后
擅政嘗語姚崇曰韋氏禍且塗地相王所居有華蓋
紫氣必位九五公善護之肅宗立語間召拜右散騎

常侍開元十六年卒

唐書
本傳

韋鑒

京兆人

工龍馬妙得精氣弟鑾工山水松石鑾子鷗

工山水高僧竒蟲老松異石筆力勁健風格高舉善
小馬牛羊山原俗人知鷗善馬不知松石更佳也咫
尺千尋駢柯攢影烟霞翳薄風雨颼颼輪囷盡偃蓋

之形宛轉極盤龍之狀

歷代名畫記

韋偃京兆人寓止蜀

川善畫馬韓幹之亞也故杜甫歌云韋侯別我有所

適知我憐君畫無敵戲拈秃筆掃驊騮歟見騏驎出

東壁好古者收得畫品錄定為妙品

益州名畫錄按名畫記偃作

鷗取其世系清晰事迹明淨故用之題名當以偃為正

車三華陰人善卜相進士李蒙宏詞及第入京注官至

華陰縣官令車三見諸公云此是李蒙宏詞及第欲

注官去看得何官車云公意欲作何官蒙云愛華陰

縣車云得此官但公無此祿如何衆皆不信及至京畢注華陰縣尉授官相賀於曲江舟上宴會諸公令蒙作序日晚序成史翹先起於蒙手取序看裴士南等十餘人又爭起看序其船偏遂覆沒李蒙士南等並被沒溺而死

定命錄

韋無忝京兆人與其弟無縱以畫稱無忝在明皇朝以畫馬及異獸擅名時外國有以獅子來獻者無忝一見落筆酷似其真百獸望而辟易明皇嘗遊獵一發

中兩貳於玄武北門命無忝傳寫之遂為一時英妙

之極官至左衛大將軍

宣和畫譜

法明

同州僧

善寫貌開元中嘗在內廷畫人物

僧蓮儒畫碑

王生

宣平坊卜者

李揆以進士調集京師聞宣平坊王生善

易筮往問之王生每以五百文決一局而來者雲集

自辰至酉不得次揆時持一縑晨往生於几下取一

縑書可十數紙授之曰君除拾遺可發此縑揆藏之

至開元中詔揆試文詞其一曰紫絲盛露囊賦二曰

答吐蕃書三曰代南越獻白孔雀表揆自午及酉而成翼日授左拾遺旬餘乃發王生之緘視之三篇皆在其中遽命駕往宣平坊訪王則竟不復見矣

唐鍾輅前

定錄

滿師

西京僧

善九宮大理卿王璿嘗問之師云公某月當

改官似是中書門下甚近玉階璿自謂黃門侍郎未可得也給舍又已過矣後果改為金吾將軍常侍玉

階

定命錄

張萱京兆人善畫人物於貴公子與閨房之秀最工其

為花蹊竹榭點綴皆極妍巧以金井梧桐秋葉黃之

句畫長門怨甚有思致又能寫嬰兒於大小歲數間

定其面目髻雅又貴賤氣調與骨法各別

宣和畫譜

萱尤

長於寫嬰兒其畫婦人以朱暈耳根為別

圖繪寶鑒

保壽

寺本高力士宅天寶九載捨為寺河陽從事李涿性

好奇古與僧善嘗至此寺觀庫中舊物忽於破甕中

得物如被幅裂汗全觸而塵起涿徐視之乃畫也因

以州縣圖三及縑三十換之令家人裝治大十餘幅
訪於常侍柳公權方知張萱所畫石橋圖也玄宗賜
力士因留寺中後為鬻畫人宗牧言於右軍尋有小
使領軍卒數十人至宅宣勅取之即日進入帝見之

大悅命張于雲韶院

酉陽
雜俎

路生長安人賣卜於市有趙自強來選就生卜馬生云
公之官若非重日即是重口後又卜生云公官九日
不出十二日出至九日宰相果索吏部由厯至十二

日勅出為左拾遺拾遺字各有一口又補闕王冕訪
卜生云九月當入省官有禮字時禮部員外陶翰在
座乃曰公即替人九月陶病請假勅除王禮部員外
後又令卜云必出當為倉字官果貶温州司倉

賈志

韓幹藍田人少時嘗為酒家送酒王維兄弟未遇每賞

酒幹常徵債戲畫地為人馬維精丹青奇其意乃與

錢二萬令幹畫十餘年今寶應寺有幹畫尤入神

段成

式寺塔記

韓幹長安人天寶初入為供奉時陳闕畫馬榮

遇一時明皇令師之幹不奉詔曰臣自有師今陛下

內廐馬皆臣師也明皇益奇之後師曹霸畫馬得骨

肉傳勻法傳染入縑素弟子孔榮頗得其法

圖繪寶鑑

幹

閒居之際忽有一人朱衣玄冠而至曰我鬼使也聞

君善圖良馬願賜一匹幹立畫焚之數日因出有人

揖而謝曰蒙君惠駿足亦有以酬効明日有人送素

縑百疋不知其來幹收而用之

獨異志

建中初有人牽

馬訪醫稱馬患脚以二千求治其馬毛色骨相馬醫

未嘗見笑曰君馬酷似韓幹所畫者真馬中固無也

因請馬主遶市門一匝馬醫隨之忽值韓幹亦驚

曰真是吾設色者乃至舍視其所畫馬本脚有一點

黑缺方知畫通靈矣馬醫所獲錢用歷數年乃成泥

錢

酉陽雜俎

嘉祐中一貴人使江南攜韓馬一匹行及回

渡采石磯風大作三日不可過欲過又大作於是禱

於中元水府廟是夕夢神告留馬當相濟翼日詣廟

獻之風止乃渡

畫史

按韓係京兆藍田人羣書言之詳矣名畫記作大梁人并誌之以

備考

賈昌長安宜陽里人生七歲趨捷過人能搏柱乘梁善
應對解鳥語玄宗在藩時樂民間清明節鬪雞戲及
即位治雞坊兩宮間索長安雄雞金毫鐵距高冠昂
尾千數養於雞坊選六軍小兒五百人使教飼民家
傾產市雞以償雞直貧者弄假雞帝出遊見昌弄木
雞於雲龍門道旁召入為雞坊小兒三尺童子入雞
羣壯者弱者勇者怯者水穀之時疾病之候悉能知

之雞畏而馴使令如人中謁者王承恩言於元宗召
試殿庭即日為五百小兒長天子甚愛幸之金帛之
賜日至其家當時號為神雞童八月五日千秋節大
合樂於宮中或於洛元會與清明節率皆在驪山至
日羣樂具舉六宮畢從昌冠雕翠金華冠錦袖繡袴
執鐸拂導羣雞敎立廣場顧盼如神樹毛振翼礪吻
磨距抑怒待勝進退有期低昂不失勝負既決隨昌
雁行歸於雞坊教孫擾龍之徒歟昌席寵四十年恩

澤不渝及亂昌變姓名依佛舍洎建元三年於長安

東門外鎮國寺東偏構小舍居之以老

陳鴻東城父老傳

謝阿蠻

新豐人

新豐進女伶謝阿蠻善舞上與妃子就按

於清元小殿寧王吹玉笛上羯鼓妃子琵琶馬仙期

方響李龜年感策張野狐箏篴賀懷智拍板自旦至

午歡洽異常曲罷妃子命侍兒紅桃取紅粟玉臂支

賜阿蠻後上自成都還復幸華清宮從官嬪御多非

舊人上命阿蠻舞凌波曲舞罷上淒然垂涕

太真外傳

馬二孃

長安人

天寶末長安有馬二孃者善考召兗州刺

史蘇詵與馬氏相善初詵欲為子萊求婚盧氏謂馬氏曰盧氏三女未知誰佳幸為致之令其母自閱視馬氏乃於佛堂中結壇考召須臾三女魂悉至馬云大者非不佳不如次者必當為刺史婦乃娶次女天寶末萊至永寧令死於祿山之難其家懲馬氏失言

後二京收復有詔贈萊懷州刺史

廣異記

楊坦楊仙喬並長安人好圖佛寺鬼神坦子爽亦善之

歷代名

畫記

盧楞伽長安人學道於吳道元但才力未及尤善作經
變相入蜀名益著乾元初嘗於大聖慈寺畫行道僧
顏真卿為之題名時號二絕又嘗畫莊嚴寺三門竊
自比道元總持壁一日道元忽見之驚歎曰此子筆
力常時不及我今乃相類精爽盡於此矣居一月楞

伽果卒

圖繪寶鑑 按名
畫記楞伽作稜伽

周昉字景元長安人寓意丹青德宗召畫章敬寺神初

落墨時徹去幄帟使往來縱觀之又寺接國門賢愚畢至或言妙處或指摘未至衆目助其得失昉隨所聞改定月餘是非語絕遂下筆成之無復瑕類當時推為第一昉為諸像精意至於感通夢寐示現相儀傳諸心匠此殆非積習所能致至於傳寫婦女則為古今之冠其稱譽流播往往見於名士詩篇文字中

宣和畫譜

郭汾陽壻趙縱侍郎嘗令韓幹寫真衆稱其善

復請昉寫之二者皆有能名汾陽嘗以二畫張於坐

側未能定其優劣一日趙夫人歸寧汾陽問此畫誰也云趙郎復曰何者最似云二者皆似後畫者為佳蓋前畫者得趙郎狀貌後畫者兼得趙郎情性笑言之姿耳後畫者乃昉也汾陽喜曰今日乃決二子之勝負令送錦綵數百疋以酬之昉平生畫牆壁卷軸甚多貞元間新羅人以善價收置數十卷持歸本國圖畫見間誌昉傳家閭閻窮丹青之妙善畫貴遊人物作士女多為穠麗豐肥之態蓋其所見然也

圖繪寶鑑

邊驚京兆人攻丹青長於花鳥折枝之妙古所未有貞
元中新羅國獻孔雀解舞德宗召於玄武門寫貌一
正一背翠彩生動金鈿遺妍若運清聲宛應繁節後
於澤潞貌五參連根精妙之極近代折枝花居其首
也

畫
斷

終南二叟趙操相國憬孽子性疎狂不慎因盜驢私竄
南出啟夏門俄屆南山漸入深遠操繫驢山木獨行
二十里忽遇人居有二白髮叟謂操曰汝既至可少

留操顧其室內妻妾孤幼不異俗世操甚安焉月餘
二叟謂操曰勞汝入都汝所乘驢貨之可得五千用
此依吾所約買之而還操出山見其驢尚在貨之果
得五千因探懷中所示之書惟買水銀耳操即為交
易歸舍二叟以雜藥燒煉俄化為黃金因以此術示
之於操自爾半年二叟徐謂操曰汝可歸三年之後
當與汝會及家相國薨再宿矣服闋因告別昆仲遊
於江湖至今無羈於世從學道者甚衆操終無傳焉

集異記

段善本

長安僧

琵琶馬上樂器貞元中有康崐崙第一手

遇長安大旱詔移南市祈雨天門街市人廣較勝負
鬪聲樂街東有康崐崙琵琶必謂街西無敵遂令崐
崙登樓彈一曲新翻羽調其街西亦建一樓東市大
謂之及崐崙度曲西市樓上出一女郎抱樂器先云
我亦彈此曲兼移在楓香調中及下撥聲如雷其妙
入神崐崙驚拜請為師女郎更衣出見乃僧也蓋西

市豪族厚賂莊嚴寺僧善本姓段以定東鄺之聲翼
日德宗召入令陳本藝乃令教授崐崙段請崐崙彈
一調及彈師曰本領何雜兼帶邪聲崐崙驚曰段師
神人也段奏曰且遣崐崙不近樂器十年使忘其本
領然後可教詔許之後果盡段之藝

樂府
雜錄

元載子伯

和勢傾中外福州觀察使寄樂妓十人既至半歲不
得送使者窺伺門下有琵琶康崐崙最熟厚遺求通
既送妓伯和一試奏盡以遺之先有段和尚善琵琶

自製西梁州崑崙求之不與至是以樂之半贈之乃

傳焉今曲調梁州是也

幽閒鼓吹

田佐元

號縣人

憲宗末年銳於服餌詔天下搜訪奇士佐

元自言有奇術能變瓦礫為黃金自白衣授本縣令

冊府

元龜

韓志和

倭國人

飛龍衛士善雕木作鸞鶴鷓鴣之狀飲啄

動靜與真無異以闕捩置腹內發之則凌雲奮飛可高三尺至一二百步外方始却下兼刻木作猫兒以

捕鼠雀飛龍使異其機巧以事奏上覩而悅之志和
更雕踏床高數尺飾以金銀綵繪謂之見龍床置之
則不見龍形踏之則鱗鬣爪牙俱出及始進上以足
履之龍夭矯若得雲雨上怖畏令撤去志和伏上前
曰臣愚昧驚忤聖躬願別進薄技以贖死罪遂於懷
中出一桐木合子方數寸中有蠅虎子數不啻一二
百其形皆赤云以丹砂啗之故也乃分為五隊令舞
涼州上令召樂以舉其曲虎子盤迴宛轉無不中節

每遇致詞處則隱隱如蠅聲曲終纍纍而退若有尊卑等級志和臂虎子令於上前獵蠅數百步內如鷄捕雀罕有不獲上賜以雜綵銀碗志和出宮門悉轉施他人不逾年竟不知所在

杜陽雜編

惟瑛

京師人

吳郡陸賓于舉進士在京師有一僧曰惟瑛

者善聲色兼知術數每言事無不驗寶曆二年春賓于欲罷舉歸吳惟瑛謂曰君來歲成名不必歸矣但取京兆薦送必在高等賓于難之惟瑛曰君成名必

以京兆薦送七月六日若食水族必殊等及第矣賓
于乃書於牖間日省之數月後因於靖恭北門候一
郎官遂迴憩從孫聞禮之舍聞禮喜迎曰向有人惠
鯉魚方欲烹之賓于素嗜魚但令具羹至者輒盡後
日因視牖間所書字則七月六日也遽命駕詣惟瑛
且給之曰將遊蒲關故來訪別惟英笑曰水族已食
矣遊蒲關何為賓于因取薦京兆果得殊等明年入
省試畢又訪惟瑛惟瑛曰君已登第名籍在十五上

下狀首姓李名合曳脚時正月二十四日賓于言於從弟符符書壁間後月餘放榜狀頭李邵賓于名在十六惟瑛又謂賓于曰君當食祿於吳越之分有一事甚速賓于不喻其意及從事於越半年而終

前定錄

趙公祐長安人寶厯中寓居蜀城工畫人物尤善佛像

天王神鬼贊皇公鎮蜀之日賓禮待之

益州名畫錄

公祐

太和間著畫名溫其公祐子幼而穎秀家學益工筆法臻妙德齊溫其子襲二世之精藝竒蹤逸筆為時

推許光化中詔許王建於成都置生祠命德齊畫西平王儀仗殿上畫后妃嬪御皆極精妙昭宗喜之遷

翰林待詔

圖繪寶鑑

常棣長安人咸通中路巖牧蜀棣入蜀巖賓禮甚厚棣畫道釋人物尤得時名喜為上古衣冠不墮近習衣冠益古則韻益勝當時有伏羲畫卦神農播種陳元達鎖諫等圖皆傳世之妙亦詩人諷諫之義也宜後世有傳焉

宣和畫譜

重引棣子僖宗幸蜀回鑾之日蜀民

奏請留御容於大聖慈寺陳敬瑄表進重引御容一
寫而成内外官屬無不歎駭謂為僧繇後身尋授殿

前翰林待詔賜緋魚袋

益州名
畫錄

呂堯竹虔並長安人工畫佛道人物僖宗朝為翰林待
詔廣明中扈從入蜀長安成都皆有畫壁

圖畫見
聞誌

趙鄂

鄜州人

武陵醫士梁新仕至尚醫奉御有朝士詣之

梁奉御曰風疾已深請速歸處置家事朝士惶懼策
馬歸時有鄜州馬醫趙鄂新到京都自榜姓名云攻

醫術朝士下馬告之鄂言疾已危與梁生所說同謂
曰只有一法請官人喫消梨不限多少咀齧不及捩
汁而飲或希萬一朝士以書留質消梨馬上旋齧到
家旬日惟喫消梨頓覺爽朗訪趙生感謝又訪梁奉
御具言得趙生教也梁公驚異遂召趙生資以僕馬
錢帛廣為延譽官至太僕卿

北夢
瑣言

唐時京城有醫人

忘其姓名有一婦人從夫南中曾誤食一蟲常疑之
由是成疾頻療不損請看之醫者知其所患乃請主

人姨姪中謹密者一人預戒之曰今以藥吐瀉但以盤盂盛之當吐時但言有一蝦蟇走去然切不得令病者知是誑紿也其姪僕遵之此疾永除

同上

王敬傲

長安人

前翰林待詔能慕善琴風骨清峻敬傲在

鄴中數歲時李山甫文筆雄健名著一方適於道觀中與敬傲相遇山甫曰幽蘭淥水可得聞乎敬傲即應命而奏聲清韻古感動神爽曲終敬傲潛然返袂云憶在咸通王庭秋夜供奉至尊之際不意流離於

此因別彈一曲坐客彌加悚敬山甫命酒停絃從容
問曰向所操者何曲也王生曰某家習正音奕世傳
受常所操弄人衆共知唯稽中散所受之曲人皆謂
絕於洛陽東市余得自先人名曰廣陵散山甫由是
常目待詔為王中散也後又遊常山是時節帥王鎔
年在幼齡初秉戎鉞方延多士以廣令名待詔琴棋
亦見禮於賓榻歲時供給莫不豐厚或揮絃動軫必
承禮遇敬傲每戴危冠著高屐優游嘯詠冬月亦葛

巾單衣體無綿纊日醺酣於市人咸異之聞昭宗返
正辭歸帝里後不知所終敬傲又能衣袖中剪紙為
蜂蝶令飛滿四座或入人襟袖以手攬之即復於故
所當時咸疑其有神仙之術

耳目記

刁光印長安人天復中避地入蜀工畫龍水竹石花鳥
貓兔黃筌孔嵩皆門弟子嘗於大慈寺承天院內窓
邊小壁四堵上畫四時花鳥體製精絕後黃居寀重
裝飾之亦有圖軸傳於世

圖畫見
聞志

趙元德長安人天復中入蜀雜工佛道鬼神山水屋木
遇唐季喪亂之際得隋唐名手畫樣百餘本故所學
精博有漢高祖過豐沛盤車講學豐稔圖傳於世忠
義元德子事孟蜀為翰林待詔雖從父訓宛若生知
蜀後主嘗令其畫關將軍起玉泉寺閣作地架一座
垂昂疊拱向背無失蜀主命匠氏較之無一差者其
精妙如此嘗與高道興黃筌輩畫成都寺壁甚多

圖畫

見聞志 按元
德一本作德元

馬處謙

扶風人

病瞽父俾其學易以求衣食嘗於安陸鬻

筮自給有一人謁筮謂馬生曰子之筮未臻其妙我有秘法能從我學之乎馬生隨往受星算之訣凡一十七行因請其爵里乃云胡姓恬名誠之曰子有官祿終五十二歲幸勿道我行止於王侯之門馬生得訣言事甚驗趙匡明棄荆入蜀因隨至成都王先主嘗令杜光庭密問享壽幾何對曰主上受元陽之氣四斤八兩果七十二而朋四斤八兩即七十二兩也

官至中郎金紫亦五十二而殞

北夢
瑣言

強紳

鳳州人

妙於三戒尤精雲氣屬王氏初并秦鳳張黃

於通衢強公指謂孫光憲曰悠悠梁蜀後何為哉於
時蜀兵初攻岐山謂其旦夕屠之強曰秦王非四海
之主雖然死於牖下乃其分也蜀人終不能尅秦而
秦川亦成丘墟矣後秦王令終王氏絕祚果叶強生
言有鹿盧蹻術自云老耄矣無人可傳其書藏在深
隱處古杉樹中因與孫光憲偕詣開樹皮發蠟緘取

出一通絹書選吉辰以授為強嫗止之謂孫少年慮

致發狂俟三年方議可否

北夢瑣言

李靄之華陰人工畫山水寒林有江鄉之思鄴帥羅中

令厚禮之為建一亭為援毫之所名金波亭時號金

波李處士也有賣藥修琴歸山圖野人荷酒寒林并

山水卷軸傳於世

圖畫見聞志

靄之畫貓尤工蓋畫貓者

必在花下靄之獨畫在藥苗間豈非幽人逸士所寓

耶

宣和畫譜

五代

廣微者華州僧也知術數末帝在河中廣微嘗密謂房
暉曰相公極貴然明年有大厄極危如得濟此凡事

不可言明年果有楊彥溫之變

冊府元龜

張濛岐州瞽者自言知術數不龜不筮言事太白山神
其神祠元魏時崔浩廟時事否泰人之休咎濛於神
傳吉凶之言房暉酷信之末帝在岐陽暉引濛謁見
聞帝語乃駭然曰非人臣也令暉詢其時即傳神語

曰三珠併一珠驢馬没人驅歲月甲寅午中興戊己
土曷請解曰神言予不知也長興四年五月府解諸
門無故自動濛見曷未交言先問曷衙署小異勿怪
不出三日有恩命其夜報至封潞王及帝被疑除鎮
甚懼再三質濛濛備保無恙及帝入洛受太后冊宰
相讀文惟應順元年歲次甲午四月庚午朔帝迴視
房曰張濛神言不亦異乎帝令曷共術士解三珠一
珠事言三珠三帝也驢馬無人驅失主也帝即位以

濛為將作少監同正賜金紫

冊府元龜

孟繼瑜長安醫工帝留守時暴疾以醫效乃攝任洎帝起兵鳳翔繼瑜在長安謁見從至洛屢進方藥年內

改諸寺少卿翰林諸醫莫得為比

冊府元龜

陳立京兆人家世為醫後唐明宗朝為太原少尹集平生驗方七十五首并修合藥法百件號曰要術刊石

置於太原府之左以示於衆病者賴焉

冊府元龜

關仝

一名種

長安人畫山水早年師荆浩晚年筆力過浩

遠甚尤喜作秋山寒林與村店野渡幽人逸士漁市
山驛使見者不復有市朝抗塵走俗之狀蓋其脫略
毫楮深造古淡如詩中淵明琴中賀若非畫工所能
知當時郭忠恕亦神仙中人亦師事全故筆法不墮
近習全於人物非所長於山間作人物多求胡翼為
之故全所畫村堡橋釣色色備有翼因得以附名於
不朽也

宣和
畫譜

關畫木葉間用墨搨時出枯梢筆蹤勁

利學者難到

圖畫見
聞誌

支仲元鳳翔人工畫人物有老子誠徐甲蕭翼賺蘭亭

商山四皓等圖傳於世

圖畫見聞誌

仲元多畫道家與神

仙像亦物外人也又喜作碁圖松下林間對棋者率

有思致

宣和畫譜

仲元畫人物極工筆法師顧陸緊細有

力清潤不俗宋高宗題作晉六朝者多仲元所作

圖繪

寶鑑

朱繇長安人工畫佛道酷類吳生維中廣愛寺有文殊

普賢像長壽寺并河中府金真觀皆有畫壁

圖畫見聞誌

畫道釋皆以道子為法獨繇不惟妙造其極而時出新意動人耳目國朝武宗元嘗在雒見其所畫壁云文殊隊中舊有善財童子予酷愛其筆法玩之月餘不忍去今遂失其童子所在信其畫亦神矣弟子趙裔亦知名

宣和
畫譜

杜子瓌華陰人精意道釋因畫圓光自謂得意非丹青家所及每詫於流輩曰我作圓光時心遊海上遐想日出扶桑滄滄涼涼其狀若此故脫略筆墨使妍淡

無迹宜他人所不能到也論者以為信然子瓌研吮

丹粉尤得其術故綵繪特異

宣和畫譜

杜覲龜秦人避地居蜀事王衍為翰林待詔博學強識

善畫佛像人物始師常粲後舍舊學自成一家故筆

法凌轢流輩粲亦莫能接武也敬安覲龜子事孟蜀

為翰林待詔生平妙於佛像尤能傳彩益州名畫錄

載為杜子瓌子未知孰是

圖繪寶鑑

按覲龜父子周旋二蜀蓋五代時人也

黃休復名畫錄以為避祿山亂者誤

李處士

關右人

石晉時能畫馴狸復能補端硯百碎者賣

歸旬日即復舊如新琢成畧無瑕類世莫得其法

珍珠

船

張及之京兆人畫犬馬花鳥頗工作犬得敦龐之狀無

搖尾乞憐態

圖繪寶鑑

跋異汧陽人工畫佛道鬼神洛中福先寺有畫壁

圖畫見聞

誌

施璘字仲實藍田人工畫竹有生意為當時絕技

圖繪寶鑑

衛賢長安人事江南李後主為內供奉工畫人物臺閣

初師尹繼昭後服膺吳體有望賢宮滕王閣盤車水

磨等圖

圖畫見聞志

賢畫高崖巨石則渾厚可取而皴法

不老林木雖勁挺而枝梢不稱其本論者少之妙處

亦人稀及

圖繪寶鑑

杜韜京兆人少為富商師衛賢深得其要賢後延為東

榻所畫與賢伯仲

圖繪寶鑑

宋

麻衣道者錢若水為舉子時見陳希夷於華山希夷曰
明日當再來若水如期往見有一老僧與希夷擁地
鑪坐僧熟視若水久之不語以火箸畫灰作做不得
三字徐曰急流中勇退人也若水辭去希夷不復留
後若水登科為樞密副使年才四十致政希夷初謂
若水有仙風道骨意未決命老僧觀之僧云做不得
故不復留老僧麻衣道者也希夷素所尊禮云

聞見
前錄

范寬

一名
中正

字中立華原人風儀峭古進止踈野常往來

京洛喜畫山水始學李成既悟乃歎曰吾與其師於人者未若師諸物吾與其師於物者未若師諸心於是居終南太華岩隈林麓之間覽其雲煙慘淡風月陰霽難狀之景默與神遇一寄筆端千巖萬壑恍然如行山陰道中天下皆稱寬善與山傳神宜與關李並馳方駕也關中人謂性緩為寬中立不以名著以俚語行故世傳范寬山水

宣和畫譜

范畫林木或側形如

偃蓋別是一種風規畫屋既質以墨籠染後世目為

鐵屋

圖畫見
開志

寬始師李成又師荆浩山頂好作密林

水際作突兀大石黃懷玉華原人有足疾時人目為

跛子學范寬頗有其格樹木皴剥人物清灑然大約

失之工

圖繪
寶鑑

劉翼耀州呼為劉評事學范寬有自得

處不知者以為寬筆

畫
繼

趙光輔耀州人太宗朝為畫院學士工畫佛道人物兼

精蕃馬筆鋒勁利名刀頭燕尾張翼者一名鈴鼯人

善畫蕃馬及人物師趙光輔得其筆法

圖畫
寶鑑

史序字正倫京兆人善推步歷算太平興國中補司天學生雍熙二年廷試中選者二十六人序為之首命知算造又知監事後累遷夏官正修儀天歷上之又嘗纂天文歷書為十二卷以獻賜金紫俄權監事大祥符三年卒序慎密勤職在監三十年未嘗有過

宋史
本傳

許道寧京兆人性跌宕不羈畫山水法李成獨造其妙可與營丘抗衡亦工傳神每見人寢陋者必戲寫貌

於酒肆識者皆笑之為其人毆擊至碎衣敗面竟不
悛後遊太華見其峰巒峭崿始有意於山水清潤高
秀濃纖得法不愧前人矣杜祁公帥長安道寧恃其
技犯公公怒捕之時种叔誼守環州道寧乃往投誼
杜公聞之笑曰道寧真善自為謀者乃貽書种公俾
善遇之在環歲餘乃歸環學從祀弟子乃道寧所作
筆也予舅吳順圖有道寧畫終南積雪圖八幅真絕
品也亡於兵太惜哉長安涼榭大屏面亦道寧所作

殊奇偉

墨莊漫錄
水家法作河

間人考宋張士遜有詩曰李成

絕世范寬老惟有長安許
道寧其為秦人無疑矣

成宗道長安人工畫人物兼善刻石凡長安壁傳吳筆

皆臨摹上石其跡細如絲髮而不失精神體段有所

集吳生三清像與左右侍衛宛如吳作或云因能勒

石後轉而為畫也又改武洞清長沙羅漢三元皆能

捨短求長自出新意過於長沙遠矣

畫繼

陶裔鄆人工畫花竹翎毛形製設色亞於黃筌為圖畫

院祇候祥符中畫御座屏宸稱旨尋改翰林待詔

圖畫

見聞志

李隱五原人工畫山水大中祥符末營會靈觀命隱寫五嶽山形於壁及畫山水於五殿屏宸觀其危峰疊

嶂遠水踈林可謂盡美

圖畫見聞志

甘風子關右人佯狂垢污恃酒好罵酒酣耳熱大叫索紙以細筆作人物頭面動以十數然後放筆如草書法以就全體頃刻而成妙合自然多畫列仙之流題

詩其後傳觀既畢往往毀裂而去好事者藏匿一二豪富求之唾罵不與或經年不落一筆故流傳者絕

少一日忽別素與遊者歸則薰浴題頌擲筆而逝

繼畫

龍章櫟陽人工畫佛道人物兼工傳寫尤善畫虎曾有貨藥人楊生檻中養一虎章因就視寫之故畫虎最

臻形似子淵有父風

圖畫見聞志

李宗成廊時人工畫山水寒林學李成破墨潤媚取象

幽竒林麓江臯尤為盡善有風雨江山拜月圖四時

山水松柏寒林等圖傳於世

圖畫見聞志

王易鄜州人工佛道人物學隣李元濟

圖畫寶鑑

曾若虛隴州道士善醫尤得鍼砭之術里有寡婦再適人遘疾且卒經日而心間尚暖家人因奔詣若虛哀祈往救既至引鍼鍼之即時而蘇良久乃能語曰始者夢故夫為一物刺中其足不能履步由是獨行忽若夢覺郡人詣若虛詢之若虛曰向之所鍼乃黃帝

鍼八邪穴也

西齋話記

雷宗道商州人工雜畫尤長於佛像山水似郭熙

圖繪寶鑑

甯濤華陰數水人師范寬多作關右風景其巧過寬而

渾厚藏蓄不及也樓觀人物纖悉畢呈失於大顯畫

繼

久中濤子也兼畫人物深得出俗之態筆意不減其

父但多平遠道路之景不起峰頂

同

蒙亨華州人初

為僧兵火後偶其兄從軍遂置軍中學其鄉人甯濤

得典型也

全上

邠州父老唐羯鼓曲今惟邠州父老能之有大合蟬滴

滴泉之曲予在廊延時尚聞其聲涇原承受公事楊
元孫因奏事回有旨令召此人赴闕元孫至邠而其
人已死羯鼓遺音遂絕

沈存中
筆談

鳳翔老尼寇萊公好柘枝舞會客必舞柘枝每舞必盡
日時謂之柘枝顛今鳳翔有一老尼猶萊公柘枝妓
云當時柘枝尚有數十遍今日所舞柘枝比當時十
不得二三老尼尚能歌其曲好事者往往傳之

夢溪
筆談

老麻關中人熙寧間以花鳥稱非蜀之居禮也

畫
繼

侯封邠人工畫山水寒林始學許道寧不能踐其老格

然而筆墨調潤自成一體亦郭熙之亞

圖畫見聞志

李希成華州人慕李成遂命名初入圖畫院能自晦以

防忌嫉比已補官始出所長衆雖睥睨無及矣

繼畫

胡奇長安人長於蘆雁何丞相文縝家有四幅圖可觀

繼畫

張衍長安人年八十以術遊士大夫門章子厚蔡持正

官州縣時許其為宰相蒲傳正薛師正未顯皆以執

政許之紹聖初伯溫官長安因論范忠宣公命衍曰
范丞相命甚似其父文正公僅作參知政事耳伯溫
又問時為監司者張芸叟陸孝叔邵仲恭吳子平數
公命衍曰皆帶職正郎員外郎耳取進於此即不可
獨仲恭數促其後芸叟為侍郎孝叔待制未幾皆謫
官孝叔帥熙子平帥秦尋卒仲恭邯鄲移常州卒年
五十五三公皆直龍圖無一不如衍言者衍病伯溫
見之則曰數已盡某日當死凡家事悉處之矣已而

果然

卽伯溫聞
見前錄

劉浩居華陰愛作雪驢水磨故事人物多布叙景致意

象幽遠筆法輕清

畫繼

張通廊延人畫仙佛

古今
畫鑑

王冲隱名持字正叔長安人長於翎毛學崔白顏魯公

鹿脯帖後有題跋妙於筆法蓋其人也嘗於邵氏見

竹棘雪禽二軸極清雅上題云正叔為伯起作伯起

名振其兄也

畫繼

賀正延安人出自戎籍畫人物山水古木怪松得郭熙

筆法

圖繪寶鑑

宣和初建寶正宮一時名手畢呈其技有

忌正者推為講堂照壁正亦不辭日醉酒於門衆工皆畢中使促正正以幕圍壁揮却其徒不數日成作

雪林高八尺觀者歎賞衆工歛衽

畫繼

符道隱長安人畫山水寒林

古今畫鑑

雍巘字幼山興元人善山水作岩崖枯木雲氣墨梅佳

畫繼

田玘廊州人作泥孩兒名天下態度無窮效之不能及一

對至直斗縑一牀至三十千一牀者或五或七也小

者二三寸大者尺餘無絕大者予家舊藏一對卧者

有小字云廊州田玘製紹興初避地東陽山中歸則

亡之矣

老學庵筆記

虞學士伯生亦有記言其精絕古今

焦書

金

陳道輔京兆人好寫墨竹自號夜江散人

圖繪寶鑑

元

蘭公和尚涇陽人嫻儒經有才力巧於射藝金元間賊

遍起蘭公以射藝救人者甚衆

雲陽志

王弘毅字子遠淳化人唐王珪裔也總角通詩書善屬

文元兵克汴避難習醫後歸元管勾太醫院事治疾

如神年四十即求退隱谷口之文川結廬溪上壽七

十五而終

淳化縣志

胡璣字元禮京兆人官至衡州路同知善畫墨竹

圖繪寶鑑

雷祥白水人能醫善陶所造磁器精工絕人世所謂雷公器是也土人間掘得祥遺器形製古質色綠沉隱秀或微作花墳起以手摩挲復勻潔無凸窪方之宣哥諸窰不啻過之

賞志

邊武字伯京京兆人善墨戲花鳥

圖繪寶鑑

明

劉純字宗厚洪武中居咸寧博學工文辭喜吟咏深明

醫道作醫經小學等書

賈志

郭伯郁郿縣人精通天文厯數善識緯之術任欽天監
春官正名重京師洪武十七年清類天文分野書成
頒賜秦晉諸王有漏刻博士元統欲推行大統厯積
分之數乃言曰皇上承運以來厯雖以大統為名而
積分猶授時之數然授時厯法以至元辛巳為厯元
至今洪武甲子積一百四年以厯法推之得三億七
千一十九萬九千七百七十五分經云大約七十年
而差一度每歲差一分五十秒辛巳至今年遠數盈

漸差天度擬合修改蓋七政之源有遲疾順逆伏見
不齊其理深奧實難推演臣聞磨勘司令王道亨有
師郭伯郁者陝西郿縣人精明九數之理深通厯學
之源若得此人推大統厯法庶幾可成一代之制蓋
天道無端惟數可以推其機天道至妙因數可以明
其理是理因數顯數從理出可相依而不可相違臣
等職在觀占推步以驗民時誠不敢以膚淺之學自
用願得博聞洽見之人任之上是其言

賈志

張徵字以周三原人精通方脉天順間舉為太醫院醫

生術屢取效尋授御醫院判

三原志

齊惠咸寧人咸寧處士郭理不與人苟合與遊者人人
嚴憚惠喜弈人有篤病當弈不肯廢見處士來即罷
弈應病者病者得惠醫皆生凡病者因其弈皆來趨
處士惠之醫與處士之方正渢然徧關中

廉對山集

王金字芝山西安人年十七遇道人墮水救歸嚴事之
已道人攜入終南授以奇秘試輒驗時屬世廟好方

伎金以白衣召見為言三元大丹稱旨歷官太常出入禁闥二十年世廟賓天廷議金等進藥不謹論刑新鄭高文襄再疏申雪得減戍閩海後數年歸依文襄以居遂為鄭人李空同夢陽與交厚贈以芝山子

辭云

河南通志

郭文英韓城人少為人牧羊以戶匠乏人至京抵役久之以巧力聞見知世廟每一工竣則序勞晉秩累階至工部右侍郎賜二品服文英聰慧善詆諧嘗會諸

搢紳談及發科經書輒笑自謂不佞起家木經衆為

絕倒

韓城志

李萬庫渭南人世號金鍼李同州丁牧母以哭夫喪明
越十年遇金鍼雙眸復炯炯時馬文莊公為文紀事
而丁牧贈詩云十年春色暗中度一旦看花識春暮
呼兒呼婦觀容顏恍惚猶疑夢中寤自萬庫歿其術

不傳

渭南志

管澤字子民咸寧學生父楫正德中進士官山左巡撫

蒞任五月翕然稱治未幾以疾歸澤躬侍湯藥因精研岐黃應手輒效遠近求醫者甚衆由是以醫名聞關輔所著有後垣元機効方藏於家

賈志

大元禪師名現本漢中人後駐錫西山潭柘寺精素難脉理及八法神鍼諸症鍼下即瘳於傷寒胎產起死恒多宮禁大璫戚里貴人皆尊事之

續文獻通考

梁時元涇陽人善寫山水得石田筆意

涇陽志

張碧山涇陽人精於八法神鍼能起疲癯衰了凡習術

於其門

涇陽志

王尚德西安右衛人幼敏慧博覽經史過目不忘善詩賦尤精醫術秦肅王疾諸藥弗瘳徵德至進藥一匕而愈王曰神醫也遂奏請授迪功郎秦藩醫正兼宜

川郃陽兩王府教授事教子孫七人入庠以壽終

賈志

路從廣字一元澄城人初任安邑改司儀封河務去積

水開沃池歷寶慶通判致政歸惟挾一鶴素精繪事

一時目為關中鸞全有畫譜行世

澄城志

天啓丙寅從

廣任臨清嘗於闌廂壁間畫虎崇禎中有諷經道士
至夜三鼓時見虎雙眸炯然從壁而下抖擻跳躍若
將攫人道士愕然不知所措急取剗柴斧格之條忽
躍上乃壁間畫虎也遲明說其事州人觀者如堵迄
今臨摹其圖者甚衆競貴售之

同上

梁世鰲字化字渭南人少力學弗售見李伯時西園雅
集圖而悅之殫精竭思十年伎成寫照宛似遊長安
轟動貴人漸聞大內值上念太后令老內侍口授形

容而筆之圖成酷肖上感動懸之內殿朝夕禮焉授
鰲武英殿中書洵異數也

縣志

柴定向字少池涇陽人善識風水能於數十里外望地
氣知休咎嘗過學宮見育才坊廢請於縣令曰此坊
復建必科第蔚興次年丙子果中鄉榜十人為役祠
太學生王中伯公卜地其山峰峻拔占者以為不利
向曰此將軍山也當有以武成名者後果驗年九十

七歲髮色如童

涇陽志

王其秦人嘗為商結隊偕發忽剪徑賊至衆潰亂王笑
曰行耳我在欲何為者叱馭前進寇至近皆僵立不
動若有膠其脛者駭汗瞪立而已王行遠寇轉動得
逸去蓋以秘術拘制之也又嘗宿旅店主人應對稍
忤時邸中有妓女數輩王怒遽捉一妓投井中衆號
客投人有知其術者勸主人前謝王意解呼妓使出
則固在室中也

曠園
雜志

本朝

王展字公輔朝邑人父經商南中溺死徒跣千里求
屍不得自以終天抱痛絕意仕進性嗜山水遂以
畫名得右丞家法家貧每乘興潑墨自給鄉人李
楷雷于霖極器重之

姜鎮蒲城人親喪廬墓六載幼習醫夢關帝君授以
盧扁之術遂神名聞關中

雜傳

商

崇侯虎帝謂文王詢爾仇方同爾兄弟以爾鉤援與爾

臨衝以伐崇墉

詩大雅

崇侯虎譖西伯於殷紂曰西伯

積善累德諸侯皆嚮之將不利於帝紂乃囚西伯於羑里閔天之徒患之乃求奇怪物獻之紂紂大悅乃赦西伯曰譖西伯者崇侯虎也西伯於是伐崇侯虎作豐邑自岐下而徙都豐

史記周本紀

正義曰崇國在豐

鎬之間詩云既伐于崇作邑于豐是也

周本紀注

周

暴公何人斯刺暴公也暴公為卿士而譖蘇公故蘇公

作是詩以絕之

詩小雅

暴蘇皆畿內國名

毛傳

漢

朱建楚人為淮南王黥布相初布欲反時問建建諫止
之布不聽漢既誅布聞建諫之高祖賜號平原君家
徙長安為人辯有口刻廉剛直行不苟合義不取容
辟陽侯行不正欲知建建不肯見及建母死貧未有
以發喪辟陽侯乃奉百金祝列侯貴人以辟陽侯故

往賻凡五百金久之人或毀辟陽侯惠帝欲誅之辟陽侯困急欲見建建辭曰不敢見君建乃求見孝惠幸臣閼孺說曰君所以得幸帝天下莫不聞今辟陽侯幸太后道路皆言君讒欲殺之今日辟陽侯誅旦日太后含怒亦誅君君何不言帝出辟陽侯閼孺從其計果出辟陽侯孝文時淮南厲王殺辟陽侯以黨諸呂故孝文聞其客朱建為其策使吏捕欲治遂自剄文帝聞而惜之曰吾無殺建意也乃召其子拜為中

大夫使匈奴單于無禮罵單于遂死匈奴中

漢書本傳

趙禹廉人以佐史補中都官用廉為令史以刀筆積勞
稍遷為御史上以為能至大中大夫與張湯論定諸
律令作見知吏傳得相監自此始張湯者杜人其父
為長安丞出湯為兒守舍還而鼠盜肉父怒笞湯湯
掘窟得鼠及餘肉劾鼠掠治傳爰書訊鞫論報并取
鼠盜肉具獄磔堂下父見之視其文辭如老獄吏大
驚遂使書獄父死後湯為長安吏給事內史為甯成

掾調茂陵尉武安侯為丞相徵湯為吏薦之天子補御史治陳皇后巫蠱獄深竟黨與於是上以為能遷大中大夫與趙禹共定諸律令務在深文拘守職之吏已而禹遷中尉徙少府湯為廷尉兩人交驩禹為人廉倨舍毋食客公卿相造請禹禹終不報謝務在人廉倨舍毋食客公卿相造請禹禹終不報謝務在絕知友賓客之請孤立行一意而已見文法輒取亦不覆案求官屬陰罪湯為人多詐舞智以御人治淮南衡山反獄皆窮根本遷御史大夫會渾邪等降漢

大興兵伐匈奴縣官空虛湯承上指請造白金及五銖錢籠天下鹽鐵排富商大賈出告緡令鉏豪強兼并之家舞文巧詆以輔法百姓不安其生騷動縣官所興未獲其利姦吏並侵漁於是痛繩以罪自公卿以下至庶人咸指湯會人有盜發孝文園瘞錢丞相青翟朝與湯約俱謝湯念獨丞相以四時行園湯無與也不謝上使御史案其事湯欲致其文丞相見知丞相患之三長史皆害湯合謀曰吾知湯陰事使吏

捕案湯左田信等曰湯欲奏請信輒先知之居物致富與湯分之天子使使簿責湯湯不服於是上使趙禹責湯禹讓湯曰君所治夷滅者幾何人矣令人言君皆有狀天子欲令君自為計何多以對簿為湯乃

自殺

史記酷吏傳

杜周南陽杜衍人

徙茂陵

少言重遲而內深刺骨為廷尉

其治大抵放張湯善候伺上所欲擠者因而陷之上所欲釋久繫待問而微見其冤狀二千石繫者新故

相因不減百餘人郡吏太府舉之廷尉一歲至千餘
章章大者連逮證案數百小者數十人遠者數千里
近者數百里會獄吏責如章告劾不服以掠笞定之
於是聞有逮證皆亡匿獄久者至更數赦十餘歲而
相告言大抵盡詆以不道以上廷尉及中都官詔獄
逮至六七萬人吏所增加十有餘萬後為執金吾遂
捕桑弘羊衛皇后昆弟子刻深上以為盡力無私遷
御史大夫周久任事列三公兩子夾河為郡守家貲

累鉅萬治皆酷暴惟少子延年行寬厚云

漢書本傳

田延年字子賓先齊諸田徙陽陵以材畧給事大將軍幕府霍光重之遷長史出為河東太守姦邪不敢發入為大司農會昌邑王嗣立淫亂霍將軍與公卿議廢之莫敢發言延年按劍廷叱羣臣即日議決宣帝即位以決疑定策功封陽成侯先是茂陵富人焦氏賈氏陰積炭葦諸物昭帝大行用度未辦延年奏言商賈或豫收方上不祥器物冀其疾用欲以求利非

民臣所當為請沒入縣官奏可富人亡財者皆怨出
錢求延年罪初大司農取民牛三萬兩為僦載沙便
橋下送致方上車直千錢延年上簿詐增僦直車二
千凡六千萬盜取其半焦贛兩家告其事下丞相府
議霍將軍召問延年抵無是事將軍曰即無事當窮

竟延年自刎死

漢書
本傳

田廣明字子公鄭人以郎為天水司馬遷河南都尉以
殺伐為治郡國盜賊並起遷為淮陽太守歲餘故城

父令公孫勇與客胡倩等謀反詐稱光祿大夫從車
騎數十言使督盜賊止陳留傳舍廣明發兵皆捕斬
焉上以廣明連擒大姦徵入為大鴻臚擢兄雲中為
淮陽太守昭帝時廣明將兵擊益州還徙衛尉後出
為左馮翊治有能名宣帝初立為御史大夫歲餘以
祁連將軍將兵擊匈奴出塞至受降城受降都尉前
死喪在堂廣明召其妻與姦既出不至質引軍空還
下太僕杜延年簿責廣明自殺闕下兄雲中為淮陽

守亦敢誅殺吏民守闕告之坐棄市

漢書本傳

陳遵字孟公杜陵人祖遂元帝時為廷尉遵舉能治劇
補郁夷令與扶風相失自免去槐里大賊趙朋霍鴻
等起遵為校尉擊朋鴻有功遵嗜酒每大飲賓客滿
堂輒關門取客車轄投井中雖有急終不得去遵大
率常醉然事亦不廢畧涉記傳贍於文辭性善書與
人尺牘主皆藏去以為榮請求不敢逆所到衣冠懷
之惟恐在後凡三為二千石王莽敗客池陽更始至

長安大臣薦遵為大司馬護軍使匈奴單于欲脅誅
遵陳利害為言屈直單于大奇之會更始敗遵留朔

方為賊所敗時醉見殺

漢書
本傳

原涉字巨先祖父武帝時以豪傑自陽翟徙茂陵涉父
為南陽太守涉父死讓還南陽賻送行喪冢廬三年
由是顯名京師舉能治劇為谷口令谷口聞其名不
言而治先是涉季父為茂陵秦氏所殺涉自劾去官
欲報仇谷口豪傑為殺秦氏亡命歲餘逢赦出郡國

豪傑及長安五陵諸為氣節者皆歸慕之沙自以先
讓賻送得名而令先人墳墓儉約非孝也乃大治起
冢舍費用皆取富人身衣服車馬纔具妻子內困專
以賑施貧窮赴人之急為務沙上冢奴買肉乘沙氣
斫傷屠者茂陵守令尹公知沙名豪欲以示衆勵俗
新豐人王游公素嫉沙說尹公墮壞沙冢舍沙遂劫
游公父及子斷兩頭去沙性似郭解外溫仁謙遜而
內隱好殺王莽末兵起諸王薦沙能得死士莽召見

拜鎮戎大尹長安敗更始將軍申屠建請沙相見大
重之故茂陵令尹公壞沙冢舍者為建主簿沙使客
刺殺主簿欲亡去建遣兵徼取沙於車上遂斬沙哀
平間郡國處處有豪傑其名聞州郡者霸陵杜君敖
池陽韓幼孺馬嶺繡君賓西河漕中叔皆有退讓之
風中叔子少游復以俠聞於世云

漢書
本傳

呂布字奉先九原人丁原屯河內以布為主簿甚見親
待董卓誘布殺原并其兵以為騎都尉稍遷至中郎

將卓行止常以布自衛嘗小失卓意卓拔手戟擲之
布拳捷得免由是陰怨卓王允時密謀誅卓因告布
使為內應許之乃刺殺卓李傕等攻長安布戰敗奔
袁術復去從張楊於河內楊諸將欲圖之布懼投袁
紹布將士多暴橫紹患之布歸張楊道經陳留太守
張邈與陳宮等迎布為兗州牧據濮陽郡縣多應之
曹操引軍擊布盡收諸城布東奔劉備時備與袁術
相拒術欲引布擊備乃與布書送米二十萬斛布大

悅即勒兵襲下邳備敗走布恚術運糧不至乃迎備
屯小沛術懼為子求婚於布布遣女沛相陳珪恐徐
揚合從為難未已往說布布乃絕婚術怒遣大將張
勲等與韓暹楊奉連勢攻布布用珪策與暹奉書許
破術兵悉以軍資與之遂共擊勲等於下邳大破之
建安三年布復從術攻劉備於沛操自將擊布布欲
降宮等阻之曹軍壅汴泗以灌其城三月布乃降見
曹曰明公所患不過於布今服矣令布將騎明公將

步天下不足定也操命緩布縛備曰不可明公不見

布事丁原董卓乎遂縊殺之

後漢書
本傳

李休字子朗有智畧張魯前為鎮北將軍休為司馬家
南鄭時漢中有甘露降子朗見張魯精兵數萬人
有
四塞之固遂建言赤氣久衰黃家當興欲魯舉號魯
不聽會魯敗太祖以其勸魯內附賜爵關內侯歷上
黨鉅鹿二郡守拜儀郎子勝少遊京師雅有才智與
曹爽善爽輔政徵為洛陽令累遷滎陽太守河南尹

勝前後所宰守未嘗不稱職後遷荊州刺史

魏畧

勝出

為荊州刺史詣宣王宣王稱疾困篤勝不能覺謂之

信然宣王收爽勝伏誅夷三族

魏志曹爽傳

孟他扶風人靈帝時中常侍張讓專朝政讓監奴典護家事他仕不遂乃盡以家財賂監奴奴與共結親積年家業為之破奴慙問他所欲他曰欲得卿曹拜耳奴許諾時賓客求見讓者或累日不得通他甫到衆奴皆迎車百拜徑將他車獨入衆人悉驚異他與讓

善爭以珍物遺他他得之盡以賂讓讓喜他又以蒲
桃酒一斛遺讓讓即拜涼州刺史他生達後入蜀

三輔

決錄

達副法正迎先主先主因念達留屯江陵蜀平

以達為宜都太守建安二十四年命達從秭歸北攻
房陵房陵太守蒯祺為達兵所害達將進攻上庸恐
難獨任乃遣劉封自漢中乘沔水下統達軍與達會
上庸太守申耽舉衆降封與達忿爭奪達鼓吹達恚
遂表辭先主率所領降魏魏文帝善之以達領新城

太守遣襲封封走還成都

三國蜀志
劉封傳

魏申儀拜魏興

太守太和中儀與孟達不和數上言達有二心於蜀

違反儀絕蜀道使救不到達死

魏畧

咸熙元年達子興

為護督軍徙還扶風

三國蜀志
劉封傳注

晉

楊佺期華陰人漢太尉震之後曾祖準太常自震至準

七世有名德祖林有才望父亮終梁州刺史以貞幹

知名佺期沉勇果勁而兄廣及弟思平等皆強獷粗

暴自云門戶承籍江表莫比時人每排抑之恒慷慨
切齒欲因事際以逞其志佺期少仕軍府領衆屯城
固苻堅將潘猛拒守康回壘佺期擊走之拜河南太
守苻堅將竇衝攻皇天塢佺期擊之累戰皆捷進號
龍驤將軍以疾去職荊州刺史殷仲堪引為司馬仲
堪與桓玄舉衆應王恭軍事一委佺期朝廷以佺期
為都督梁雍秦三州諸軍事雍州刺史仲堪玄皆有
遷換於是俱還尋陽結盟不奉詔朝廷復仲堪本職

乃各還鎮。佺期仲堪與桓玄素不穆。佺期欲與仲堪襲玄。仲堪內疑。苦止之。不得舉。隆安三年。桓玄舉兵討佺期。先攻仲堪。仲堪急召佺期。佺期曰。江陵無食。可來見。就共守襄陽。仲堪紹之曰。比來收集已有儲矣。佺期率衆赴焉。既至。仲堪惟以飯餉其軍。佺期大怒。不見仲堪。明日乘艦出戰。玄拒之。不得進。會玄諸軍至。佺期退走。餘衆盡沒。佺期與兄廣俱死。弟思平從弟尚保敬敬俱逃。劉裕起義。始歸國。歷位州郡。攷

敬為人剝銳果於行事為梁州刺史經襄陽見魯宗之侍衛皆佞期之舊憤見辭色宗之叅軍劉千期於座面折之因大怒抽劍刺千期立死宗之表而斬之

思平尚保後亦以罪誅楊氏遂滅

晉書本傳

宋

魯爽郢人祖宗之雍州刺史宋武帝討劉毅宗之會江陵自以非武帝舊隸有自疑之志北奔入姚氏病卒父軌隨父入姚氏武帝定長安軌北奔魏魏以軌為

荊州刺史爽少有武藝軌死代為荊州刺史粗中使
酒數有過失太武怒將誅之爽懼密懷歸南計次弟
秀小字天念頗有意畧仕魏以軍功為中書郎與爽
俱來奔文帝以爽為司州刺史秀為滎陽潁川太守
孝武帝即位爽謀反左將軍薛安都刺殺之

南史本傳

杜幼文

驥子杜陵人

太宗初以軍功為驍騎將軍封邵陽縣

男後以發太尉廬江王瑋謀反事拜黃門侍郎出為
梁南秦二州刺史廢帝元徽中為散騎常侍幼文所

蒞貪橫家累千金女伎數十人絲竹晝夜不絕與沈
勃孫超之居止接近常相從又與阮佃夫厚善廢帝
不能平於是率宿衛兵誅幼文等

宋書杜
騏傳

北魏

寇彌萬年人為尚書郎為陽城王徽所親愛永安末徽
避爾朱兆脫身南臺歸命於彌彌不納遣人加害時

論深薄之

魏書寇
讚傳

北齊

孫騰字龍雀石安人少而質直明解吏事魏正光中北方擾亂間關危險得達秀容屬公朱榮建義隨榮入洛尋為高祖都督府長史高祖為晉州騰為長史高祖平鄴授騰相州刺史天平初入為尚書左僕射內外之事騰咸知之時西魏遣將寇南兗詔騰為南道行臺率諸將討之騰屢怯無威畧失利而還又除司徒武定中使於青州括浮逃戶口遷太保騰早依附高祖契濶艱危勤力恭謹深見待信及高祖置之魏

朝寄以心腹遂志氣驕盈與奪由已求納財賄不知
紀極在鄴與高岳高隆之司馬子如號為四貴非法
專恣騰為甚焉武定六年薨

北齊書
本傳

隋

宇文忻字仲樂本朔方人徙京兆幼而敏慧年十二能
左右馳射驍捷若飛高祖龍潛時與忻情好甚協及
為丞相恩顧彌隆尉迴作亂以忻為行軍總管進臨
相州斬獲畧盡直趨鄴下迴軍大敗及平鄴城以功

加上柱國是後每參帷幄出入卧內禪代之際忻有
力焉忻既佐命功臣頻經將領有威名於當世上由
是徵忌焉以譴去官陰圖不軌謀洩伏誅

隋書
本傳

蘇威字無畏

絳子武功人

周文帝時襲爵美陽縣公隋文帝

受禪徵拜太子少保俄兼納言初威父綽以國用不
足為征稅法頗稱為重歎曰所為者正如張弓非平
世法也後之君子誰能弛乎威至是奏減務從輕典
時高頴與威同心協贊政刑大小無不籌之遷吏部

尚書兼祭酒律令格式多威所定拜尚書右僕射國
子博士何妥奏威朋黨復言威以曲道任其從父弟
徹肅等罔冒為官上令按之事皆驗免威官爵未幾
復拜納言仁壽初拜右僕射時天下大亂威知帝不
可匡正甚患之屬帝問盜賊事宇文述曰盜賊少威
曰臣非職司不知多少但患其漸近帝不悅裴蘊希
旨奏威典選濫授人官於是除名其年從幸江都宇
文化及弒逆以威為開府儀同化及敗歸李密密敗

歸東都王世充僭署太師威自以隋室舊臣遭逢喪
亂所經之處皆與時消息以求容免太宗平王世充
威請謁見稱老病不能拜上遣人數之曰公隋朝宰
輔政亂不能匡救致令品物塗炭君弑國亡見李密
世充皆拜伏舞蹈今既老病無勞相見入長安至朝
堂請見又不許終於家威行已清儉然每至公議惡
人異己無大臣體所修格令章程頗傷煩碎論者以
為非簡久之道大業末年尤多征役至於論功行賞

威每承望風旨輒寢其事時羣盜蜂起郡縣有奏聞者又訶詰使人令減賊數故出師攻討多不尅捷由是遂致敗亂為物議所譏

隋書本傳

唐

侯君集三水人太宗在藩引入幕府數從征伐建成元吉之誅也君集之策居多貞觀四年遷兵部尚書參議朝政君集出自行伍素無學術及被任遇方始讀書典選舉定考課並有時譽高昌王麴文泰過絕西

域詔以君集為交河道行軍大總管討之遂平其國
君集初破高昌未奏請輒配沒無罪人又私取寶物
有司請推其罪詔下獄中書侍郎岑文本疏奏乃釋
君集殊怏怏尋與諸功臣同畫像凌煙閣時庶人承
乾在東宮恐有廢立數問以自安之術君集遂贊承
乾陰圖不軌及事發被收羣臣爭請誅之太宗謂君
集曰與公長訣矣遂斬之籍其家

唐書

楊纂字續卿

弘農族父
華陰人

大業時第進士高祖度河上謁

長春宮遷累侍御史後為吏部侍郎有俗才抑文雅

進黜吏度時舞數以自進終戶部尚書

唐書楊弘禮傳

羅藝字子延襄陽人家京兆之雲陽父榮隋監門將藝
剛愎不仁勇攻戰大業中自稱幽州總管宇文化及
至山東遣使招藝藝斬使者為煬帝發喪時竇建德
高開道亦遣使於藝藝謂官屬曰建德等皆劇賊不
足共功名唐公民望所係王業必成吾決歸之武德
二年奉表以地歸詔封燕王藝弟監門將軍壽以兵

從請入朝帝厚禮之拜左翊衛大將軍藝負其功不
少屈秦王左右嘗至其營藝痕辱之時突厥橫放籍
藝威名詔以本官鎮涇州太宗即位進開府儀同三
司藝內懼乃圖反稱密詔入朝治中趙慈皓統軍揚
發謀誅藝藝敗左右斬之壽時為利州都督亦反誅

唐書
本傳

豆盧欽望萬年人祖寬隋梁泉令高祖定關中率豪姓
進欵擢累殿中監子懷讓左衛大將軍欽望累官越

州都督擢尚書左僕射平章軍國事居宰相積十餘年方易之三思等怙勢宣烝窺間王室缺冀非常

不能有所裁抑獨謹身自全卒年八十

唐書本傳

姚璿字令璋

思廉孫萬年人

少孤力學永徽中舉明經第補太

子宮門郎遷中書舍人武后時擢夏官侍郎坐從弟

敬節叛貶桂州長史后方以符瑞自神璿取山川草

樹名有武字者以為上應國姓哀類以聞后大悅擢

文昌左丞證聖初加秋官尚書明堂火后欲避正殿

應天變璫奏此人火非天災也不宜避正殿貶常禮
后乃更御端門大酺燕羣臣與相娛樂遂造天樞著
己功德命璫督之功費浩廣見金不足乃斂天下農
器并鑄以功賜爵一級坐累下遷益州長史始蜀吏
暴貪璫擿發之無所容貸后聞降璽詔慰勞浮屠理
中謀據劍南有密告者詔璫按其獄疑似捕逮株聯
數千人道路冤譟拜地官冬官二尚書久之致仕卒

唐書姚
思廉傳

韋巨源與安石同系

萬年人

有吏幹武后時累遷夏官侍

郎同鳳閣鸞臺平章事其治委碎無大體神龍初以
吏部尚書同中書門下三品時要官缺執政以次用
其親巨源秉筆當除十人楊再思得其一餘皆諸宰
相近屬再思喟然巨源曰時當爾爾士大夫莫不解
體尋遷侍中貝州大水刺史宋璟議免其租巨源以
為蠶桑可輸由是河朔人多流徙者景龍二年韋后
自言衣笥有五色雲巨源勸中宗宣布天下帝從其

言因是大赦巨源見帝昏惑乃與宗楚客等推據祥妖陰導韋氏行武后故事俄遷尚書左僕射仍知政事帝方南郊巨源請后為亞獻而自為終獻及臨淄

王平諸韋亂兵殺之

唐書本傳

竇懷貞

始平人

少說激仕累清河令有治狀神龍中進左

御史大夫兼檢校雍州長史會歲除中宗夜宴近臣謂曰聞卿喪妻今繼室可乎懷貞唯唯俄而禁中竇扇障衛有衣翟衣出者乃韋后乳媪王所謂菖國夫

人者故蠻婢也懷貞納之世謂媼壻為阿奢時懷貞
每謁見奏請輒自署皇后阿奢人或謂為國奢軒然
不慚以自媚於后又附宗楚客安樂公主等以取貴
位韋后敗斬妻獻其首貶濠州司馬景雲初以殿中
監召再遷侍中方太平公主干政懷貞日詣主第刺
取所欲睿宗為金仙玉真二公主營觀諫者交疏不
止惟懷貞勸成之躬護役作弟維鎰諫曰公位上衮
當思輔天子而計較瓦木厠身工匠間使海內何所

瞻仰不答督繕益急時語曰前作后國奢後為主邑
丞言事公主如邑官屬也玄宗受禪進左僕射與太
平公主謀逆既敗投水死然生平所得俸祿悉散親
族敗時惟米數石而已性謫詐宦者用事尤所畏奉
或見無鬚者誤為之禮從子競舉明經為鄆令百姓

德之

唐書
本傳

祝欽明字文思始平人擢明經為東臺典儀拜著作郎
為太子率更令中宗在東宮欽明兼侍讀授太子經

中宗復位擢國子祭酒同中書門下三品進禮部尚書封魯國公桓彥範崔玄暉袁恕已敬暉等皆從受周官大義朝廷尊之以匿親忌日為御史中丞蕭至忠所劾貶申州刺史入為國子祭酒景龍三年天子將郊欽明與國子司業郭山惲陰迎韋后意謬立議后當助天子祀天神祭地祇帝果用其言以皇后為亞獻帝與羣臣宴欽明自言能八風舞帝許之欽明體肥醜據地搖頭睨目左右顧盼帝大笑吏部侍郎

盧藏用歎曰是舉五經掃地矣景雲初侍御史倪若水劾奏欽明等腐儒無行以諂佞亂常不宜在朝乃貶饒州刺史欽明於五經為該淹自見坐不孝免無以澡祓乃阿附韋氏圖再用又坐是見逐諸儒羞之後人為崇文館學士卒

唐書本傳

王璵方慶六世孫咸陽人少為禮家學玄宗在位久推崇老子道好神仙事廣修祠祭靡神不祈璵上言請築壇東郊祀青帝天子入其言擢為祠祭使璵專以

祠解中帝意有所禳祓大抵類巫覡漢以來葬喪皆有瘞錢後世里俗稍以紙寓錢為鬼事至是璵乃用之肅宗立累遷太常卿又以祠禱見寵乾元三年拜同平章事乃奏置太一壇勸帝身見九宮祠帝嘗不豫太卜建言崇在山川璵遣女巫乘傳分禱天下名山大川巫皆盛服中人護領所至干託州縣賂遺狼籍卒贈開府儀同三司

唐書本傳

元載字公輔岐山人天寶初策高第補新平尉累遷戶

部侍郎李輔國妻載宗女也因相締昵拜同中書門下平章事代宗立輔國勢愈重數言其才進拜中書侍郎未幾判天下元帥司馬盜殺李輔國載與其謀復結中人董秀刺取密旨探微揣端無不諧契魚朝恩驕橫震天下與載不叶乃乘間奏誅朝恩初四鎮北庭行營節度使寄治涇州大厯八年吐蕃寇邠寧議者謂涇州不足守載嘗在西州具知河西隴右要領乃言於帝曰國家西境極於湟原吐蕃防戍乃在摧

沙堡而原州界其間草薦水甘舊壘存焉請徙京西
軍戍原州乘間築作二旬可訖是為斷西戎脛朝廷
高枕矣田神功沮短其議帝疑不決載智畧開果久
得君以為文武才畧莫已若外委主書卓英倩內刼
婦言縱諸子關通貨賄京師要司及方面皆擠忠良
進貪猥開南北二第室宇奢廣帳帟什器名姝異伎
雖禁中不逮帝深戒之載卒警然不悛會李少良上
書詆其醜載奏殺少良道路目語帝積怒大厯十二

年收載賜自盡妻王及子伯和仲武季能並賜死發其祖父冢斲棺棄屍籍其家董秀卓英倩悲論死英倩弟英璘家金州州人緣以授官者百餘豪制鄉曲聚無賴以伺變恃載權牧宰莫敢問載敗盜庫兵據險叛詔發兵討捕刺史孫道平禽殺之

唐書本傳

楊炎字公南天興人祖哲以孝行稱父播舉進士退居求志炎文藻雄蔚豪爽尚氣父喪廬墓終喪為司勳員外郎遷中書舍人元載與炎同郡炎又元出也親

重無比會載敗坐貶道州司馬德宗即位拜門下侍郎同平章事初定令有租賦庸調法開元承平久不為版籍百役並作賦斂之司數四莫相統攝權臣巧吏託進獻為贓盜者動萬萬計故課免於上而賦增於下炎疾其弊乃請為兩税法戶無主客以見居為簿人無丁中以貧富為差其田畝之稅則以大厯十四年墾田之數為準而均收之夏稅盡六月秋稅盡十一月歲終以戶賦增失進退長吏而尚書度支總

焉天下利之炎素德元載思有以報之復議城原州
節度使段秀實謂方農事不可興功炎怒追秀實為
司農卿又以劉晏劾載已坐貶乃出晏忠州用庾準
為荆南節度使誣晏殺之朝野側目李正己表請晏
罪炎乃遣腹心分走諸道聲言宣慰而實自辯言晏
往嘗傳會姦邪帝自惡之帝聞使中人復其言於正
己還報信然帝意啣之盧杞秉政罷為尚書左僕射
其子弘業賂狼籍杞按之並得他過貶崖州司馬

賜死初炎矯厲志節頗得名既傳會元載忮害根中

不能自止睚眦必讐果於用私終以此及禍

唐書本傳

竇參字時中刑部尚書誕四世孫

平陵人

學律令為人矜

嚴悻直以蔭累為萬年尉同舍當夕直者聞親疾惶遽參為代之會失囚京兆按直簿劾其人參曰彼往參當坐乃貶江夏尉人皆義之進大理司直按江淮獄入為御史中丞德宗數召見語天下事或決大議帝器之俄以中書侍郎同中書門下平章事領度支

鹽鐵使參無學術不能稽古立事惟樹親黨多所訶
察四方畏之於是淄青李納厚饋參外示嚴畏實賂
帝親近為間左右爭毀短參申參族子也為給事中
參特愛之每議除授多訪於申申或泄之以招權賂
所至人目之為喜鵲帝聞戒參曰卿他日必為申所
累不如出之以掩物議參曰臣無強子姪申雖疎屬
臣素親之不忍遠出請保無他犯帝曰而雖自保如
外言何參固陳丐初陸贄與參不平吳通元兄弟與

贄軒輊不得申舅嗣虢王則之與通微等善遂共譖
贄帝得其姦逐申為道州司馬貶參郴州別駕宣武
劉士寧餉參絹五千湖南觀察使以狀聞帝怒貶參
驪州司馬賜死於邕州而杖殺申

唐書
本傳

韋渠牟萬年人少慧悟涉覽經史初為道士復為僧興
元中韓滉鎮浙西奏授試秘書郎累轉四門博士貞
元十二年四月德宗誕日御麟德殿召渠牟及道士
萬叅成沙門譚延等十二人講論儒道釋三教渠牟

枝詞游說捷口水注上謂其講耨有素聽之意動數
日轉秘書郎旬日遷右補闕歲終遷右諫議大夫延
英奏事率漏下五六刻上笑語款狎往往外聞渠年
形神佻躁無士君子器志尚不根道德頗張恩勢以
招趨嚮上既偏聽浮薄率背本銜進以附渠年遷
太府卿又轉太常卿卒

舊唐書
本傳

于頔字允元後周太師謹七世孫蔭補千牛累遷湖州
刺史部有湖陂異時溉田三千頃久廢頔行縣命

修堤闕歲獲秔稻蒲魚無慮萬計州地庫濕薄葬者
不掩柩頤為坎瘞枯骨千餘人賴以安未幾改蘇州
為政有績然暴橫少恩俄遷大理卿為陝虢觀察使
益自肆峻罰苛懲官吏惴恐叅軍姚峴不勝虐自沈
於河貞元十四年拜山南東道節度使時吳少誠叛
頤率兵自唐州戰吳房朗山取之禽其將李粲又勝
之濯神溝於是請升襄州為大都督府廣募戰士儲
良械閭然有專漢南意公斂私輸持下益急而慢於

奉上俄擅以兵取鄧州天子未始誰何初襄有髹器
天下以為法至頤驕蹇故方帥不法者號襄樣節度
憲宗立權綱自出頤稍懼願以子尚主帝許之遂入
朝拜司空同平章事時宦者梁守謙幸於帝頗用事
有梁正言者與頤子敏善敏因正言厚賂守謙求頤
出鎮久不報敏怒其紿責所饋誘正言奴支解之家
童上變詔頤貶恩王傳子敏竄雷州至商山賜死次
子季友奪二官正及方免官久之拜戶部尚書又坐

李友居喪荒宴削金紫光祿大夫鬱鬱不得意卒方
長慶時通豪俠欲事河朔以策干宰相元稹而李逢
吉黨謀傾執政乃告稹結客刺裴度事下有司驗無

狀方坐誅

唐書
本傳

杜亞字次公京兆人肅宗在靈武上書論當世事擢校
書郎再遷諫議大夫遷給事中常袞惡之出為江西
觀察使德宗立召還亞意必任台宰倍道進與人語
皆天下大政或以事祈謁輒相然可帝知不悅罷為

陝號觀察使興元初拜淮西節度使至則治漕渠引
湖陂築防庸入之渠中以通大舟夾堤田因得溉灌
人皆悅賴然雅意丞弼厭外官往往不親事日夜召
賓客言噓流連方春南民為競渡戲亞欲輕駛乃髯
船底使篙人衣油綵衣沒水不濡觀沼華邃費皆千
金自是府財耗竭貞元中罷歸以檢校吏部尚書留
守東都病風痺且廢猶欲固寵奏墾苑中為營田可
減度支歲稟詔許之先是苑地可耕者皆留司中人

及屯士占假亞計窘更舉軍帑錢與旬人至秋取菽粟償息輸軍中貧不能償者發困害畧盡流亡過半

又賂中人求兼河南尹帝審其妄賜還卒

唐書本傳

王遂

備孫咸陽人

好興利操下以嚴累遷鄧州刺史會兵宿

淮西亟財賦藉遂幹強拜宣歙觀察使蔡已平師東討李師道為檢校左散騎常侍兼御史大夫始調兵食歲三百萬俄而賊誅遂簿羨貲百萬以獻帝高其能即拜遂沂兗海觀察使遂資編刻杖扑皆踰制盛

夏治署舍墻垣程督慘峭裨校王弁殺之自知留事
帝拜弁開州刺史至徐州械送京師斬東市監軍上
遂所製杖出示於朝為戒云

唐書王
琳傳

韋執誼京兆舊族幼有才及進士第對策異等授右拾
遺年踰冠入翰林為學士便敏側媚得幸於德宗帝
誕日皇太子獻畫浮屠像帝使執誼贊之太子賜以
帛執誼到東宮謝太子卒見無所藉言乃曰君知王
叔文乎美才也執誼由是與叔文善順宗立以疾不

親政事叔文用事乃擢為尚書左丞同平章事叔文
與王伾居中竊命執誼奉行因迷奪朝權執誼既為
所引然外迫公議欲示天下非黨與者乃時時異論
相可否密謝叔文曰不敢負約欲共濟國家事爾叔
文數為所梗遂成仇怨憲宗受內禪貶執誼為崖州

司戶叅軍死

唐書
本傳

杜元穎如晦五世孫貞元末及進士第以右補闕為翰
林學士敏文辭憲宗特所賞歎穆宗以元穎多識朝

章尤被寵拜同平章事甫再期出為劍南西川節度使敬宗驕僻元穎每欲中帝意以固幸乃巧索珍異獻之踵相躡於道斂取苛重至削軍食以助裒畜又給與不時戍人寒飢於是人人咨苦戎備不修太和三年南詔乘虛襲戎雋等州遂入成都大掠數日去由是斥為循州司馬死貶所

唐書杜如晦傳

韋綬字子章萬年人有至性然好不經喪父鑱臂血寫浮屠書建中末為長安尉朱泚亂羸服走奉天拜華

陰令三遷職方郎中穆宗為太子綬入侍讀遷諫議
大夫方太子幼綬數為俚言以悅太子他日侍太子
為帝道之帝怒曰綬當以經義輔導太子而反語此
朕何賴焉外遷虔州刺史穆宗立召為尚書右丞集
賢院學士出入禁中怙寵甚俄為山南西道節度使
入辭乞賜錢二百萬官子元弼太常丞帝以舊恩許
之綬耄而貪不能事軍政綱維亂弛卒謚謬醜

唐書
本傳

令狐湫

綯子華
原人

避嫌不舉進士綯輔政湫與鄭顥為姻

家怙勢驕偃通賓客射取四方貨財皆側目無敢言
懿宗嗣位數為人白發其事絢因丐高與羣進士試
有司詔可是歲及第長安尉累遷詹事府司直湮阨

不振死

唐書令狐
楚傳附

五代

敬翔字子振馮翊人少工書檄為館驛巡官太祖與蔡
人戰汴郊翔謀畫多中太祖欣然謂得翔之晚太祖
奉昭宗自岐還長安昭宗召翔與李振升延喜樓勞

之拜翔太府卿太祖即位以翔為金鑾殿大學士翔
深沉有大畧從太祖用兵三十餘年細大之務必關
之翔亦盡心勤勞晝夜不寢自言惟馬上乃得休息
太祖崩友珪立以李振代翔為崇政使莊宗入汴詔
赦梁羣臣振邀翔欲俱入見翔夜止高頭車坊將旦
左右報曰崇政李公入朝矣翔歎曰李振謬為丈夫
矣復何面目入梁建國乎乃自經而卒

五代史
本傳

韋震字東卿萬年人初名肇為人彊敏有口辯事梁太

祖為都統判官昭宗幸石門太祖遣震由號畧間道奉表行在昭宗賜名震太祖已破兗鄆遂攻吳大敗於清口太祖懼諸鎮乘間圖已乃諷杜洪鍾傳王師範錢鏐等薦已為元帥且兼求領鄆州昭宗初不許震彊辯敢大言語數不遜昭宗卒許梁以鄆州太祖遂兼四鎮表震鄆州留後昭宗遷洛震入為河南尹六軍諸衛副使以病瘖守太子太保致仕太祖受禪改太子太傅末帝即位加太師卒

五代史本傳

劉景巖延州人為丹州刺史晉高祖起兵太原唐廢帝
調民七出一卒為義兵延州節度使楊漢章發鄉民
赴京師將行景巖遣人激怒之義兵亂殺漢章迎景
巖為留後晉高祖即位即拜景巖節度使景巖從事
熊皦為人多智陰察景巖跋扈難制因語景巖以為
邊地不可以久安為陳保名亨利之策言邠涇多善
田其利百倍宜多市田射利以自厚景巖信之歲所
獲甚多景巖使皦朝京師皦乃言景巖不宜在邊可

徙之內地乃移景巖邠州又徙武勝景巖乃悟皦為
賣已開運三年景巖罷武勝以太子太師致仕居華
州契丹犯京師以周密鎮延州景巖乃還故里而州
人逐密立高允權允權妻劉氏景巖孫女也允權妻
歲時歸省景巖謂曰高郎一縣令而有此州其可保
乎允權意惡之乃誣其反而殺之長子行琮德州刺
史亦被誅次子行謙允權婦翁也為奏言非劉氏子
遂免不誅

五代史
本傳

姚顗字百真長安人少嫿不修容止舉進士事梁為中書舍人唐莊宗滅梁貶復州司馬已而以為散騎常侍兼吏部尚書左丞廢帝擇宰相拜顗同平章事顗為人仁恕不知錢帛數御家無法在相位齷齪無所為唐制吏部分為三銓尚書曰尚書銓侍郎二人曰中銓東銓天成中詔三銓合為一顗為相復分為三選人多不便之往往遞宰相喧訴不遜顗無如之何

晉高祖立罷為戶部尚書卒

五代史本傳

楊思權邠州新平人事梁為控鶴軍使莊宗滅梁以為
甲夾馬都指揮使明宗時秦王從榮為河東節度使
使思權為北京步軍都指揮以佐佑之從榮素驕多
不法時宋王從厚為河南尹謙恭好禮明宗遣人語
從厚之善以諷勉之從榮謂思權曰我將廢矣奈何
權曰公有甲士而思權存何患也乃勸從榮募死士
以為備明宗召思權還京師後為羽林都指揮使將
兵戍興元潞王從珂反鳳翔興元張虔釗會兵討賊

思權攻城西破兩關城從珂登城呼外兵告以已非
反者軍士反逐虔釗思權因呼其衆曰潞王真吾主
也即擁軍士入城降從珂乃出紙於懷中曰願志臣
姓名以為驗從珂即書曰可邠寧節度使廢帝立即
拜思權靜難軍節度使後為左衛上將軍卒

五代史
本傳

趙瑩字元暉華陰人為入純厚美風儀事梁將康延孝
為從事晉高祖為保義軍節度使以瑩掌書記自是
徙鎮常以瑩從高祖將起兵瑩勸高祖無反高祖即

位累拜中書出為晉昌節度是時出帝童昏馮玉等
用事以瑩柔弱易制復引為相契丹滅晉瑩從出帝
北徙虜中為太子太保子易則易從當其北徙與易

從俱易則留事漢官刑部郎中

五代史
本傳

蘇逢吉長安人漢高祖鎮河東父悅為高祖從事逢吉
常代悅作奏記悅言之高祖高祖以為節度判官高
祖性剛嚴賓佐稀得請見逢吉獨入終日侍立高祖
書閣中兩使文簿盈積莫敢通逢吉輒取內懷中伺

高祖色可犯時進之高祖多以為可以故甚愛之然
為人貪詐無行喜為殺戮高祖嘗生日遣逢吉疏理
獄囚祈福謂之靜獄逢吉入獄無輕重曲直悉殺之
以報曰獄靜矣高祖建號拜同平章事時制度草創
逢吉素不學問隨事裁決出其意見不施德政時天
下多盜逢吉草詔下州縣凡盜所居本家及鄰保皆
族誅由是殺人滋濫嘗從高祖征鄴數使酒辱周太
祖太祖恨之隱帝立太祖起兵官軍敗逢吉自殺於

民舍

五代史
本傳

宋

竇貞固字體仁白水人父專後唐左諫議大夫貞固能
屬文同光中舉進士授河東節度推官時晉祖在藩
以貞固廉介甚重之及即位擢為戶部員外郎就拜
中書舍人少帝即位遷禮部尚書知貢舉舊制進士
夜試繼以三燭長興二年改令晝試貞固以晝晷短難
盡士材奏復夜試擇士平允時論稱之改刑部尚書

漢祖入汴貞固率百官見於滎陽西初管宗廟帝以
姓自漢出遂襲國號尊光武為始祖並親廟為五詔
羣臣議貞固上言陛下重興漢祚伏請立高曾祖禰
四親廟更立始祖在四廟之外尊高皇帝光武皇帝
為始祖法文王武王不遷之制用歷代六廟之規庶
合典禮漢祖從之論者以為非禮拜司徒門下侍郎
平章事隱帝即位加司徒楊邠史弘肇王章樹黨恣
橫專權凌上貞固但端莊自持不能規救周祖兵起

貞固遂詣周祖周祖登位加兼侍中俄罷相守司徒
封沂國公世宗即位以范質為司徒貞固遂歸洛陽
齒為編民宋初貞固詣范質求任東宮三少質不為
奏乃還洛病困自為墓誌卒

宋史
本傳

王易簡字國寶萬年人性介特寡合曾祖肱劍州刺史
祖遠連州刺史父貫唐州刺史易簡少好學工詩梁
乾化中舉進士召為右拾遺上書忤旨出為鄧州節
度推官後唐同光中為魏王府記室叅軍明宗即位

周帥羅周恭辟為掌書記府罷退居華陰作小隱詩
二十首秦王從榮聞而重之召為祠部員外郎晉初
拜御史中丞吏部侍郎判吏部銓晉祖在大梁臺省
湫隘易簡奏舉故事得元省錢二百萬繕治省署及
造器物周初遷禮部尚書俄改刑部判兵部顯德四
年致仕宋初加少保卒子景讓進士及第至尚書郎

宋史
本傳

蘇曉武功人父瓚仕後唐歷秘書少監長興初曉辟鄧

州從事漢祖鎮太原表為觀察使歷屯田郎中宋乾德三年出為淮南轉運使建議摧斬黃舒廬壽州茶置十四場規其利歲八百餘萬緡開寶三年改西川轉運使仍掌京城市征擢拜左諫議大夫七年監在京商稅九年卒曉深文少恩當時號為酷吏及卒無子有一女甚鍾愛亦先曉卒人以為深刻所致

宋史

本傳

崔嶧字之才長安人進士及第知遂州建議瞿塘峽置

開如劍門以察奸人徙提點刑獄嘉陵江歲調民丁
治堤塢嶧更用州兵代役文州蕃卒數剽攻邊戶嶧
請守臣歲時行邊益募勇壯伺其發一切捕擊之後
無復內寇就除河東轉運使會更錢法潞州民大擾
推其首惡誅之人心遂定後遷集賢院學士知河中
府嶧所至貪奸比老益甚至河中請老以刑部侍郎

致仕卒

宋史
本傳

王陶字樂道萬年人第進士嘉祐初為監察御史裏行

神宗立拜御史中丞郭逵以簽書樞密宣撫陝西詔
令還都陶言韓琦置逵二府至用太祖故事出師却
制人主琦必有姦言惑亂聖德願罷逵陶始受知於
琦帝初臨御陶料必易置大臣欲自軌重位故視琦
如仇力攻之帝徙陶為翰林學士出知陳州入權三
司使呂公著言其反覆不可近以東宮舊臣加觀文
殿學士帝薄其為人不復用元豐三年卒陶微時苦
貧寓京師其友姜愚氣豪樂施一日大雪念陶奉母

寒荷一鋪剗雪行二十里訪之陶母凍坐日高無炊
煙愚亟解所衣錦裘質錢買酒肉薪炭又捐數百千
為之娶陶既貴尹洛愚老而喪明往謁之意陶必念
舊哀已陶對之邈然但出尊酒而已愚大失望歸而
病死聞者益薄其為人

宋史
本傳

姚古

兖州人

以邊功官累熙河經略靖康元年金人逼

京城古與种師中俱勤王种師道與古子平仲先已
率兵入衛兩家子弟各不相下平仲恐功獨歸种氏

乃夜劫幹里雅布營反為所敗尼雅滿陷隆德府以古為河東制置种師中副之古總兵援太原師中援中山河間諸郡古進兵復隆德府威勝軍扼南北關師中與金人戰互有勝負太原圍不解師中進師平定乘勝復壽陽榆次朝廷數使人趣師中戰約古及張灝兩軍齊進而二人失期不至師中敗而死金人迎古于盤陀古兵潰退保隆德中丞陳過庭奏古罪不可

恕詔安置廣州

宋史姚
兕傳

劉延慶保安軍人世為將家數從西伐立戰功積官至
廊延路總管遷節度從北伐以宣撫都統制督兵十
萬渡白溝延慶行軍無紀律郭藥師叩馬諫不聽至
良鄉遼將蕭幹帥衆來延慶與戰敗績遂閉壘不出
藥師曰幹兵不過萬人今悉力拒我燕山必虛願得
奇兵五千倍道襲取令公子三將軍簡師為後繼延
慶許之藥師先入燕城幹舉精甲三千卷戰三將軍
光世渝約不至藥師失援敗走延慶營於盧溝橋南

明旦見火起以為敵至燒營而奔相蹂踐死者百餘里自熙豐以來所儲軍實殆盡燕人作賦及歌誚之靖康之難延慶分部守京城城陷引秦兵萬人奪開遠門以出為追騎所殺

宋史本傳

光世字平叔延慶次子

初以蔭補三班奉職累陞廊延路鈐轄康王即位以功加檢校少保命討李成執其謀主陶子思加檢校太保殿前都指揮使苗劉為亂素憚光世遷淮南制置使張浚在平江馳書諭以勤王不從呂頤浩遣使

說之乃引兵會韓世忠破之命為江東宣撫使受杜
充節制光世言受充節制有不可者六帝怒詔母入
光世殿門光世始受命隆祐太后在南昌議者謂金
人自蘄黃渡江陸行二百里可至命光世移屯江州
為屏蔽光世既至日置酒高會金人自黃州渡江凡
三日無知者比金人至遂遁授浙西安撫大使知鎮
江府光世言安撫控制一路若但守鎮江則他郡有
警不可離任望別除守臣光世專充安撫使從便置

司時光世慮金人必過江故預擇便地帝覺之止許
增辟通判金兵留淮東光世畏其鋒楚州被圍已百
日帝手札趣光世援楚者五竟不行但遣王德鄴瓊
將輕兵以出時奏殺獲而已授檢校太傅張浚言其
沈酣酒色不恤國事乞賜罷斥光世引疾罷

宋史
本傳

金

鄭建充字仲實其先京兆人占籍鄜州仕宋累官知延
安府事天會七年來降仍知延安府宋劉光烈來攻

建充擊破之遷京兆府路兵馬都監敗宋曲端於彭
原高昌宗據延安為宋守建充擊之盡復城邑復知
延安軍府事朝廷以地賜宋為宋環慶路經畧安撫
副使仍知寧州天眷復取陝西仍以為經畧安撫使
知慶州從破甘谷城改平涼尹時營建南京宮室大
發河東陝西材木浮河而下筏工多沉溺有司不敢
以聞乃誣以逃亡錮其家建充白其事錮者得釋建
充性剛暴常畜獠犬十數奴僕有罪既笞已復噬犬

齒之骨肉都盡郡省部文移有不應法度輒置之坐
下或即毀裂由是在位者銜之軍胥李換誣充藏甲
欲反死於獄中長子懇亦死焉

金史
本傳

明

呂震字克聲臨潼人洪武中鄉舉入太學朝廷行天下
則壤均賦震承檄之兩浙報命稱任使擢山西按察
僉事入為戶部主事尋出為北平按察僉事成祖潛
邸恭順有勞及即位累擢刑部尚書轉禮部命兼領

戶兵二部事震深中寡言當其獨坐深念以手指刮
眉毛則必有精思密計諸官屬相誠無敢白事主事
尹昌隆白震事震獨坐不應少選復前震怒拂衣起
曰君自行之何以問為昌隆不得請有語以公舊事
東官皇太子素重公何不取令旨行之昌隆從其計
震怒奏昌隆上為下昌隆獄尋赦復官後數年谷王
謀反以王嘗保奏昌隆為長史坐昌隆與謀下公卿
雜問昌隆力辯震折之夷其族仁宗朝加太子太保

宣德元年病面疽宛轉病呼曰尹相尹相家人問故

曰尹昌隆守而欲殺我震竟死

名山藏

王命字子將同州人嘉靖己酉舉人慷慨有膽畧乙卯歲凶地震盜賊所在鈔掠命時宅憂糾宗守望其弟弗良即勒令自盡於是威望大著州使君聞之就命問計因假之事權命乃墨衰仗劍巡行鄉聚訪緝大小偷或挺或刺死者枕藉道路以目盜賊雖少戢然中多濫及無辜亦有斃於睚眦者後銓知蔚州不久

卒官

同州志



陝西通志卷六十四